

元遺山詩集箋注

元遺山詩集箋注卷六

烏程

施國祁北研箋

蔣炳枕山校

樂府

陵川集遺山墓誌云爲古樂府不用古題特出新意以爲怨思者又百餘篇

天門引

秦王深居不得近從破衡成欲誰信白頭游客困咸陽憔悴
黃金百斤盡海中仙人黃鵠舉大笑人間爭腐鼠丈夫何意
作蘇秦六印才堪警兒女古來多爲虛名老不見阿房淨如
掃千年虎豹守天門一日牛羊臥秋草

黃鵠舉

韓詩外傳田饒語魯哀公曰夫黃鵠一舉千里啄君稻粟君猶貴之者以其從來遠也

蛟龍引

古劍咸陽墓中得抉開青雲見白日蛟龍地底氣如虹土花

千年不敢蝕洪爐烈焰初騰精橫海已覺無長鯨世上元無
倚天手匣中誰解不平鳴割城恨不逢相如佐酒恨不逢朱
虛尚方未入朱雲請盟槃合與毛生俱誰念田文坐中客只
將彈鋏嘆無魚

洪爐

吳越春秋干將曰昔吾師之作冶也金鐵之類不銷夫妻乃斷髮剪指投之爐使童子二百鼓鑪壯炭金鐵乃濡

朱虛

史記齊悼惠世家高

后燕飲令朱虛侯劉章爲酒吏章請以軍法行酒諸呂有一人醉者拔劍斬之方斬馬劍斷佞臣一人以厲其餘

尚方

漢書朱雲傳成帝時丞相安昌侯張禹以帝師位特進甚尊重雲曰臣願賜尚

湘夫人詠

木蘭芙蓉滿芳洲白雲飛來北渚遊千秋萬歲帝鄉遠雲來
雲去空悠悠秋風秋月沅江渡波上寒煙引輕素九疑山高
猿夜啼竹枝無聲墮殘露

北渚

九歌湘夫人帝子降于北渚目眇眇兮愁余

輕素

沈約詩長煙引輕素

湘中詠

楚山鶴鳴風雨秋
楚岸猿啼送客舟
江山萬古騷人國
猿鳥無情也解愁
西北長安遠於日
憑君休上岳陽樓

長安遠

晉明紀帝幼聰哲坐間長安使來元帝問曰汝謂日與長安孰近對曰長安近不聞人從日邊來明日安羣臣又問對曰日近舉頭見日不見長安

岳陽樓

杜甫詩昔聞洞庭水今上岳陽樓

孤劒詠

鬱鬱重鬱鬱
夜半長太息
吟成孤劒詠
門外山鬼泣
清霜稜稜風入骨
殘月耿耿燈映壁
君不見一飢縛壯士
僵臥時自惜黃鵠一舉摩蒼天
誰念樊籠束修翼

渚蓮怨

阿溪何許來
素面浣風雨
寂寞煙中魂
依依欲誰語

芳華怨

歸潛志元裕之季長源同鄉里各有詩名由其不相下頗不相感李好慎怒之舊云長源有憤華經元好滑稽李輒以詩譏罵元亦

無如之何元壽權國史院編修官時末帝召故駙馬都尉僕散阿海女子入宮俄以人言其罪又蒙放出元因賦金谷怨樂府詩李見之作代金谷佳人荅一篇以拒焉一時士人傳以爲笑談元詩云云李詩云石家園林洛水濱粉垣碧瓦迷天津樓臺參差映金谷歌舞日日嬌青春是時天下甲兵息江南已傳歸命臣永平以來太康治四海一口無窮人洛陽城中厭醕醢司隸夜過不敢噴王門賊里爭豪後車馬如水爭紅塵燒金斫玉延上客季倫豈輸趙王倫兩家炎炎相軋竿竿嘈嘈妓成列珊瑚紅樹鞭聲碎步障青絲馬踏裂因緣睚眦貴人怒詔下黃門促收捕郵夫防吏急宣驅河南牒繫御史府鐘鳴漏盡行不休生存華屋歸山邱綠珠香魂沈塵土侍兒忍居樓上頭君王慈明青率土妾身竄名籍民伍平生作得健兒婦狗走雞飛豈敢惡元和其詩先于稱工

娃兒十八嬌可憐亭亭裊裊春風前天上仙人玉爲骨人間畫工畫不出小小油壁車軋軋出東華金縷盤雙帶雲裾踏雁沙一片朝雲不成雨被風吹去落誰家少年豈無恩澤侯金鞍繡帽亦風流不然典取鸛鷀裘四壁相如堪白頭金谷樓臺悄無主燕子不來花著雨只知環珮作離聲誰向琵琶得私語無情灘鴻翡翠兒有情蜂雄蛺蝶雌勸君滿酌金屈

卮明日無花空折枝

油壁

李賀詩油壁車文相待李商隱詩油壁香車不再逢

金縷

隋禮志簪囊二品以上金縷宋禮志凡慶節進金縷延壽帶

雁沙

李賀歌雲

裾數步

恩澤侯

漢書有外戚恩澤侯表

金谷

石崇詩序有別館在河南縣界金谷澗

蜂蝶

李商隱詩花房與蜜脾蜂雄蛺

蝶

金屈卮

于武陵詩勸君金屈卮滿酌不須辭

折枝

古詩莫待無花空折枝

後芳華怨

江南破鏡飛上天三五二八清光圓豈知汴梁破來一千日
寂寞菱花仍半邊白沙漫漫車轆轤鯢雞絃中杜鵑哭塞門
憔悴人不知枉為珠娘怨金谷樂府初唱娃兒行彈碁局平
心不平只今雄蜂雌蝶兩不死老眼天公如有情白玉搔頭
綠雲髮玫瑰面脂透肉滑春風著人無氣力不必相思解銷
骨洛花絕品姚家黃揚州銀紅一國香千圍萬繞看不足雨
打風吹空斷腸丹砂萬年藥金印八州督不及秦宮一生花

裏活長門曉夕壽相如儘著千金買消渴

破鏡

古詩何日大刀頭破鏡飛上天又詩話陳太子舍人徐德言有破鏡詩

鯢雞

楚辭鴟雞鳴而悲鴟琴賦鴟雞游絃古相和歌有鴟雞曲

彈棋

李商隱詩莫近彈棋局中心最不平

丹砂

本草丹砂久服通神明不老梁武樂府但使丹砂就能令億萬年

秦宮

長吉消句

渴

西京雜記相如素有消渴疾及還成都悅文君之色遂發痼疾乃作美人賦以自刺

結楊柳怨

長樂坡前一杯酒鄭重行人結楊柳可憐楊柳千萬枝看看盡入行人手輕煙細雨綠相和惱亂春風態度多路人愛是風流樹無柰朝攀暮折何朝攀暮折何時了不道行人暗中老素衣今日洛陽塵白髮明朝塞城草柳色年年歲歲青關人何事管離情春風誰向丁寧道折斷長條莫再生

素衣

古詩京洛多風塵素衣化為綈

秋風怨

碧瓦高梧響疎雨坐倚薰籠時獨語守宮一著死生休狗走
雞飛莫爲女雲間簫鼓夜厭厭禁漏誰將海水添一春門外
羊車過又見秋風拂翠簾總把丹青怨延壽不知猶有竹枝
鹽

守宮

漢書東方朔傳注守宮蠱名也術家云以器養之食以丹砂滿七斤搗治萬杵以點女體終身不滅若有房室之事則滅矣○李賀詩花房夜搗紅守宮

歸舟怨

渡頭楊柳青復青閨中少婦動離情只從問得狂夫處夜夜
夢到洛陽城南風吹櫓聲北雁鳴嚶嚶江流望不極相思春
草生

征人怨

瀚海風煙掃易空玉關歸路幾時東塞垣可是秋寒早一夜
清霜滿鏡中

瀚海

史遷去病傳
登臨瀚海

塞上曲

平沙細草散羊牛一簇征人在戍樓
忽見龍頭新雁過一時
迴首望南州

西樓曲

游絲落絮春漫漫西樓曉晴花作團
樓中少婦弄瑤瑟一曲未終坐長嘆
去年與郎西入關春風浩蕩隨金鞍
今年匹馬妾東還零落芙蓉秋水寒
并刀不剪東流水湘竹年年露痕
紫海枯石爛兩鴛鴦只合雙飛便雙死
重城車馬紅塵起乾鵲無端爲誰喜
鏡中獨語人不知欲插花枝淚如洗

并刀

杜甫詩安得并州快剪刀
剪以吳淞半江水

後平湖曲

越女顏如花吳兒潔如玉天教竝牆居不著同被宿美人一笑千黃金連城不博百年心樓上牆頭無一物暮爨朝春一生足秋風拂羅裳秋水照紅妝舉頭見郎至低頭采蓮房郎心只如菱刺短妾意未覺藕絲長與郎期何許眼凝同舟女春波澹澹無盡情雙星盈盈不得語十里平湖艇子遲岸花汀草伴人歸鴛鴦驚起東西去唯有蜻蜓接翅飛

越女

宋之問句

涪川行

涪川道邊日欲西誰家少婦掩面啼漫漫長路行不徹粉綿鏡衣手自攜自言娼家女家在梁門東夫婿輕薄兒新人不相容憶初在家時只辦放嬌慵耶娘惜女如惜玉近前細看面發紅無端嫁作蕩子婦流落棄擲風埃中可憐桃李花顏

色嬌蒙茸朝看花枝好暮看花枝空安得明珠三百斛重簾
複幕圍春風

粉綿

陸游詩粉綿磨鏡不忍照

面紅

樂府今日牛羊上丘壑當時近前面發紅

長安少年行

黃衫少年如玉筆生長侯門人不識道逢豪客問姓名袖把
金鞭側身揖臥馳行橐鏡帕蒙石槓壓漿銀作筒八月蒼鷹
一片雪五花驕馬四蹄風日暮新豐原上獵三更歌舞灞橋
東

黃衫

唐書禮志明皇嘗令樂工少年姿秀者衣黃衫文玉帶立左右杜甫詩黃衫年少來宜數不見門前東逝波

黃金行

中州集王筆字飛伯少日作樂府擬古別離有黃鸝樓高雲不飛鵝鵝洲寒星已曙之句人多傳之其後八京師大爲李欽叔所稱

與之詩云詩句婉國風下者猶楚辭贈詩者甚多有云憶昔灞亭見飛伯恍若夢中逢李白又云紫陌仙人今帶雲騎風御氣七尺身又云良金元有價自璧况無瑕又云王郎少年詩境新氣象慘澹含古春筆頭仙語復鬼語只有潘李無他人飛伯用是韻自貴重云○歸潛志王飛伯奇士

也少余一歲與余交最深儀狀魁奇目光如鵠步武翩然相者云病鶴狀也少居釣臺閉門讀書不接人事數載爲文閱肆奇古動輒數千百言法柳柳州歌詩飄逸有太白氣象初爲御史程公震所知繼爲李翰林欽叔麻徵君知幾史學優嘉其且其爲廷譽藉藉正大初余先于台葉飛伯持諸公書來授先子其文置門下遂與余定交每暢酒燕游無不在已而入南京見趙雷諸公皆稱之不已布衣少年名動京師後因下第西游洛中余居淮陽凡三過雷輒數月唱酬談論相高每相別輒以所著相寄且相商訂爲益正大末南京被圍復相守圍城中天與改元秋飛伯忽過余別曰吾跼伏陷奔不自得今將突圍遠舉然死生未可知因出其所作王子小傳屬余曰茲不朽之託也余不能止之而去三年不知存亡丙申歲南游過交游輩說飛伯初爲東諸侯兵士所得其將厚遇之飛伯徑行不設機久之爲其下所忌見殺臨終懷中出書曰是吾平生著述可傳付中州士大夫王飛伯死矣計其時年甫三十余哭諸鎮陽蓋飛伯爲人雖聰穎絕人然涉世日淺頗驚傲不通徹此所以不免余常見其舉止言談無顧忌旁爲變然而飛伯益自信真能戒以是常得謗議爲俗人所憎才氣稍有鍛鍊其文章所至多易量哉今而中道摧折不迄于大成可以爲斯文嘆其詩文往來與余最多有淮陽唱和南頓聯句古賦銘贊書序數十首遭亂皆在余囊中今仍略載其小傳云又受知最深者曰楊軒公完顏璘開闢公趙秉文余先子雷淵李獻能王若虛麻九疇史學優程震宋九嘉其游從最久者曰李汾楊宏道元好問魏璠張邦直杜仁傑曹居一雷瑄冀禹錫張介王說王采蒼趙著張甫王鑄劉輯李全劉源楊與胡權徒單公履呂熙史環李儀侯策張傑劉郁左坦牛汝霖米虎達烏林荅爽僧性英諸公至于心交者惟李治劉祁二人而已○中州集密國公璘王生以秋騷見示復以此謝之詩又李欽叔題飛伯詩囊詩又送歸陽翟詩○

明一統志釣魚臺在順天府西花園釣臺下有泉
涌出為池其水至冬不竭相傳金人王鬱隱此

王郎少年詩境新氣象慘澹含古春筆頭仙語復鬼語只有
溫李無他人天公著詩貧子身子曾不知乃自神人間不買
詩名用一片青衫衡霍重兒貧女富母兩心何論同袍不同
夢入門喚婦不下機淚子垢面兒啼飢君詩只有貧女謠何
曾夢見金縷衣外家翁媼日有語嫁女書生徒爾為昆陽城
下三更酒醉膽輪囷插星斗一昔詩腸老蛟吼十尺長人墮
車走斫頭不屈三萬言欲向何門復低首何人壽我黃金千
使君破鏡飛上天

古春

李賀詩古
春年在

蛟吼

蘇軾詩劍在牀頭詩在
手不知誰作蛟龍吼

黃金

李白詩綺羅錦繡
段有贈黃金千

隋故宮行

渭川楊柳先得春二月鶯啼百轉新長春宮中千樹錦暖日

晴雲思煞人君王半醉唱吳歌絳仙起舞嘯翠蛾吳兒謾說
曾行樂三十六宮能幾多千秋萬古金銀闕海沒三山一毫
髮繁華夢覺人不知留得寒蟬泣秋月

吳歌

隋五行志大業十一年楊帝飲酒大醉因賦詩令美人吟咏○通鑑帝好爲吳語嘗夜置酒語絳仙曰且其樂飲耳因引滿沈醉帝幸江都龍舟殿脚女中有吳絳仙者柔麗不與羣輩齒帝吟持檝篇以賜之

絳仙

古樂府楊

解劍行

古劍黑於漆鬱鬱動星文摩挲二十年今日持贈君長鯨鼓浪三山沒知君不是泥中物袖間一卷白猿書未分持刀買黃犢壯懷風雲鬱沈沈慚媿漂母無千金長安侏儒飽欲死萬古不解天公心北風浩浩吹行客隴水無聲雪花白荆卿墓頭秋草乾擊筑行歌欲誰識君不見秦相五綬皮去時烹雞炊扃屨又不見敝裘蘇季子合從歸來印纍纍丈夫墮地

自有萬里氣翕忽變化安能知大冠如箕望吾子富貴同生

亦同死

星文

王維詩聊持寶劔動星文白猿書拾遺記周羣妙閑算術識說游岷山采藥見白猿從絕峰而下化為一老翁握中有玉版長八寸以授羣

隴水

古樂府隴頭流水鳴聲咽墮地蘇軾詩天驕墮地走萬里端可期

征西壯士謠

三十未有二十強手內蛇矛丈八長總爲官家金印大不怕
百死向沙場捉卻賀蘭山下賊金鞍繡帽好還鄉

蛇矛

隴上歌七尺大刀配齊環丈八蛇矛左右盤

賀蘭山

北邊備對賀蘭山在靈州保靖縣山有林木青白綠如駝馬北人呼駝馬爲賀蘭

望雲謠

涉江采芙蓉芙蓉待秋風登山采蘭茗蘭茗霜早彫美人亭
亭在雲霄鬱搖行歌不可招湘絃沈沈寫幽怨愁心歷亂如
曳蘭金支翠蕤紛在眼春草迢迢春波遠

望歸吟

塞雲一抹平如截，塞草離離臥榆葉。
長城窟深戰骨寒，萬古牛羊飲冤血。
少年錦帶佩吳鉤，獨騎匹馬覓封侯。
去時只道從軍樂，不道關山空白頭。
北風吹沙雜飛雪，弓絃有聲凍欲折。
寒衣昨夜洛陽來，腸斷空閨搗秋月。
年年歲歲望還家，此日歸期轉未涯。
誰與南州問消息，幾時重拜李輕車。

長城窟

水經余至長城其下往往有泉窟可飲馬古詩飲馬長城窟行信不虛也

吳鈞

樂府少年傷行驄馬金絡頭錦帶佩吳鈞

從軍

樂

王粲詩從軍有苦樂但問所從誰

輕車

鮑照詩始從張校尉後遂李輕車

梁園春五首

車駕遷汴京後作○史宣紀貞祐二年四月乙卯尚書省奏巡幸南京詔從之五月乙亥上決意南遷詔告國內王

千車駕發中都秋七月車駕至南京

軍從南去三迴勝，雪自東來二尺強。
今歲長春多樂事，內家

應舉萬年觴

長春憑陵誕節名

長春

宣紀貞祐三年三月壬申長春節宋遣使來賀

暖入金溝細浪添津橋楊柳綠纖纖賣花聲動天街遠幾處
春風揭繡簾

上苑春濃畫景閑綠雲紅雪擁三山宮牆不隔東風斷偷送
天香到世間

樓觀沈沈細雨中出墻花木亂青紅朱門不解藏春色燕宿
鶯喧處處通

雙鳳簫聲隔綵霞宮闕催賞玉谿花誰憐麗澤門邊柳瘦倚

東風望翠華

龍德宮有玉谿館麗澤燕都西門名

麗澤

地志中都路天德四年始圖上燕城宮室制度三月命張浩等增廣燕城門十三東曰施仁曰宣曜曰陽春南曰景風曰豐宜曰端禮西曰麗澤曰顯華曰

彰義北曰會城曰通元曰崇智曰光泰

採花詞五首

宋先生于宣宗興定五年中進士第年三十有二其同年生可考者劉過鼎臣李國維德之趙端明正之史元邦直

李欽若獻誠欽用獻甫康靖口口散茲鼎臣張夢祥黃德卿盧元長卿王
口元禮郭邦彥平甫田錫永錫趙璧教之焦茂才口獻臣蘇蓮其十八人
外喬松茂等十餘人為經義進士幹勸業
德二十八人為女直進士並詳本傳箋

禁裏蒼龍啟九關殿前鸚鵡喚新班沈沈綠樹鞭聲遠嫋嫋
薰風扇影閑

浩蕩春風入繡鞍可憐東野一生寒皇州花好無人管不用
新郎走馬看

六十人中數少年風流誰占探花筵阿欽正使才情盡猶欠

張郎白玉鞭

李欽用二十七歲張夢祥少一歲又未婚云

探花

秦中歲時記進士杏園初宴謂之探花宴差少後二人為探花使遍游名園若他人先折花二使皆被罰

美酒清歌結勝游紅衣先為渚蓮愁曲江其說櫻桃宴不見

西園風露秋

櫻桃宴

王保定撫言新進士尤重櫻桃宴乾符四年永寧劉公第二子單及第時公以故相鎮淮南勅郎吏日以銀一錠資單歸

人物風流見藹然逼人佳筆已翩翩龍津春色年年在莫著
新銜惱必先

惱必先

蔡寬夫詩話開試後始稱前進士故當時詩云短行書可屬
三銓休把新銜惱必先從此便稱前進士好將春色待明年

獵城南

翩翩游俠兒白馬如匹練朝出城南獵暮趨軍中宴北平有
真虎愛惜腰間箭

春風來

春風來時瑤草芳綠池珠樹宿鴛鴦春風去後瑤草歇來鴻
去燕遙相望鴛鴦不得雙燕鴻天一方娟娟愁眉色靜與遙
山長錦衾復羅薦夢語相思怨月明烏夜啼空閨淚如霰

幽蘭

仙人來從舜九疑辛夷爲車桂作旂疏麻導前杜若隨披猖

芙蓉散江離南山之陽草木腓澗崗重複人迹希蒼崖出泉
懸素霓儵然獨立風吹衣問何爲來有所期歲云暮矣胡不
歸釣天帝居清且夷瑤林玉樹生光輝自棄中野誰當知霰
雪慘慘清入肌寸根如山不可移雙麋不返夷叔飢飲芳食
非尚庶幾西山高高空蕨薇露槃無人薦湘纍山鬼切切雲
間悲空山月出夜景微時有彩鳳來雙棲

梅花

去歲梅花晚今歲梅花早和羹要佳實春風莫草草

寶鏡

寶鏡挂秋水青蛾紅粉妝春風不相識白地斷肝腸

續小娘歌十首

天祿識遺娘字俗書當作孃通爲婦女之稱韓魏公傳云宮中稱郭后爲大孃劉妃爲小孃皇家亦如此稱不獨民間也案李長吉洛妹真珠詩真珠小娘下青寧洛苑香飛風綽綽唐

人亦有此稱惟題首有續字則前人必有小娘歌未知誰作俟考補入

吳兒沿路唱歌行十十五五和歌聲唱得小娘相見曲不解
離鄉去國情

北來游騎日紛紛斷岸長堤是陣雲萬落千邨藉不得城池
畱著護官軍

山無洞穴水無船單騎驅人動數千直使今年畱得更教
何處過明年

青山高處望南州漫漫江水遶城流願得一身隨水去直到
海底不迴頭

風沙昨日又今朝踏碎鷗頭路更遙不似南橋騎馬日生紅
七尺繫郎腰

雁雁相送過河來人歌人哭雁聲哀雁到秋來卻南去南人
北渡幾時迴

竹溪梅塢靜無塵二月江南煙雨春傷心此日河平路千里

荆榛不見人

河平

地志河北西路
衛州河平軍

太平婚嫁不離鄉楚楚兒郎小小娘三百年來涵養出卻將
沙漠換牛羊

飢鳥坐守草間人青布猶存舊領巾六月南風一萬里若爲
白骨便成塵

黃河千里扼兵衝虞虢分明在眼中爲向淮西諸將道不須

誇說蔡州功

蔡州

地志南京路蔡州○哀紀天興二年六月己卯決策遷蔡詔蔡惠陳頴各以兵
來迓己亥上入蔡州七月丁卯遣使分詣諸道選兵會于蔡八月甲戌大元使

王機諭宋還宋以軍護其行上聞爲之懼丁丑上閱兵于見山亭乙酉大元召宋兵攻
唐州宋人駐兵息州南九月癸卯朔內族阿虎帶使宋借糧入辭上諭之曰宋人負朕
深矣朕自即位以來戒飭邊將無犯南界邊將有白請征討者未嘗不切責之向得宋
一州隨即付與近淮陰來歸彼多以金幣爲贖朕若受財是貨之也付之全城秋毫無

犯清口臨陣生獲數千人悉以資糧道之今乘我疲敝據我壽州誘我鄧州又攻我唐州彼爲謀亦淺矣大元滅國四十以及西夏夏亡及我我亡必及於宋唇亡齒寒自然之理若與我連和所以爲我者亦爲彼也卿其以此曉之至宋宋不許辛亥大元兵築長壘圍蔡城十一月辛丑朔宋遣其將江海孟琪師兵萬人獻糧三十萬石助大元兵攻蔡十二月丁丑大元兵決練江宋兵決柴潭入汝水○宋理宗紀紹定五年與蒙古合兵圍汴京金主奔歸德府再遣使議夾攻六年八月孟琪拔唐州十月江海領襄軍合蒙古兵圍蔡州端平元年正月己酉蔡城破○齊東野語端平元年甲午史嵩之子申開荆湖閫遂與孟琪合發兵夾攻蔡城獲亡金完顏守緒殘骸以歸乃作露布以誇耀一時○元史太宗紀三年辛卯帝將合南北軍攻汴遣行人速不罕詣宋假道淮東以攻河南從太祖命也至汴州宋統制張宣誘殺之冬拖雷聞宋殺使者即移師伐宋破輿元入大散關直趨饒風關四年壬辰冬十二月使宣撫王檝至宋議其伐金宋遣口仲口謝帝許以成功以河南歸宋○元史塔察兒傳金主遷蔡州塔察兒與宋將孟珙合師圍蔡○案先生不及見宋亡而已料及此宋王厚齋云本朝以女真滅契丹而中原之亡以女真女真之將亡也吾國又不鑒宣和而用夾攻之策不知春秋之義也輔車唇齒之喻兩地孤臣有同慨者乎

并州少年行

以下續編

北風動地起天際浮雲多登高一長嘯六龍忽蹉跎我欲橫江關蛟鼉萬弩迸射陽侯波或當大獵燕趙間黃熊朱豹皆遮羅男兒萬馬隨撓訶朝發細柳暮朝那歸雲黑山布陽和

歸來明堂見天子黃金橫帶冠峩峩人生只作張騫傅介子
遠勝僵死空山阿君不見并州少年夜枕戈破屋耿耿天垂
河欲眠不眠淚滂沱著鞭忽記劉越石拔劍起舞鷄鳴歌東
方未明兮奈夜何

細柳

三輔黃圖細柳館在長安西北三輔舊事云漢文帝大將軍周亞夫軍于細柳今呼古微是也

朝那

後漢書國志安定郡朝那縣張仁愿傳築三

受降城北拓地三百餘里于牛頭朝那山北置烽候一千八百所

張傳

皆漢使通西域者各見本傳

劉越石

晉書劉琨傳字越石中山人少

與祖逖爲友常曰恐祖生先我著鞭

怒虎行

荅宋文之

怒虎當道卧百里不敢唾紛紛射彪手一見弧矢墮誰知世
有李將軍霹靂弦聲驚石破昨日雙南金今日綠綺琴贈君
無別物惟有百年心

金琴

文選張載擬四愁詩佳人遺我綠綺琴何以贈之雙南金

元遺山詩集箋注卷六終

元遺山詩集箋注卷七

烏程

施國祁北研箋

蔣炳枕山校

五言律詩

懷益之兄

中州集元東巖傳云家集雜識以來凡三失之今所存者特吾益之兄及門生輩所記憶者耳本集八卷懷詩注云時在閬鄉

三十七卷南冠錄引云歲甲午拘管郾城益之兄邈在襄漢又承奉銘好謙當卽是

世故伊川歎鄉情越客音天宜他日定陸已向來沈冉冉愁
看老源源事益侵誰言易排遣自分不勝任鞭影驚疲馬鐘
聲急暮禽跼中無曠迹喧外有幽尋夢失名家筆書存遺子
金山田和石瘦茅屋過雲深春雨蔬成圃秋霜柿滿林樹陰
涼拂席花氣澹盈襟宿鷺窺晨汲孤猿伴暝吟溪僧時問字
野客或知琴抱璞休奇售臨觴得緩斟阿兄團聚日曾話百

年心

伊川

語見左傳莊子方且與世違而心不

排遣

陸游詩不道渾無排遣處痛看周易問梳頭

百年

杜甫詩時序百年心

汴禪師自斲普照瓦為研以詩見餉為和二首

寺廢瓦不毀研奇功亦多已知良斲少更奈苦心何挺挺剛
無敵津津潤可呵羽陽陵谷變冰井字書訛贈比黃金璞辭
慙紫石歌遙知玉音在洗耳俟研磨

潤呵

揮麈後錄孫之翰人與一研直三千錢曰此石呵之則水流

羽陽

書苑近有長安民餉羽陽宮五十餘枚若今前瓦然紫石

李賀青花紫石研歌端州石工巧如神踏天磨刀割紫雲

點化鉛仍見堅凝鐵易穿何年埋朽壤此日睹青天古色秋
煙重哀音夜雨懸有刀堪切玉是鏡不名塼佛陰淪空劫書
林結後緣禪河一勺水更擬就師傳

鐵穿

五代史桑維翰事 鏡傳燈錄禪師磨磚欲成鏡馬祖曰難不成師曰磨磚既不成鏡坐禪豈能成佛

惡雨

惡雨惡復惡龍公何遽然
霆轟冰塢碎電掣玉繩連
高岸皆深谷層霄一漏泉
黑來疑擁海白散忽成煙
市響千門合潮頭萬弩穿
天瓢休盡建枯旱有他年

癸巳除夜

鼎定周元重薪安漢已然不隨南渡馬虛泛北歸船身並枯
蜩化心爭脫兔先塵埃嗟落薄光景強留連往事青燈裏浮
生白髮前更殘鐘未動猶屬出京年

薪然

漢書賈誼傳夫抱火厝之積薪之下而寢其上火未及然因謂之安 脫兔史記田單傳論夫兵以正合以奇勝始如處女適人開戶後如脫兔適不

及留連

梁元帝歌人生行

出京年

案八卷有癸巳四月二十九日出京詩

病中

病因食猪動氣而作癸卯四月二十一日晨起書

元集卷七

戰勝頗自恃寧知徒外腴文章工作祟時運迫摧枯止酒嗟
何及燒猪本不圖膏粱無急變山澤有真臞詩信藤條戲方
遭鐵彈誣鹽紅忘後顧鬣黑見先驅眩入投牀仆晨淹伏枕
呼萬錢誰嘔泄一鬻爾乘除靜伏心仍悸深調息亦麤跼嫌
囚宇宙渴憶捲江湖風柳留蟬蛻霜松映鶴孤養和懲往失
扶老念時須杯杓歸神誓垣牆任佛踰回谿且垂翅望或在
桑榆

止酒

陶淵明有止酒詩燒猪蘇軾詩遠公沽酒飲陶藤條冷齋夜話蔡脈詩若把瓊根

鐵彈

白居易詩化吾手為彈吾因以求為鹽紅蘇軾詩遠公沽酒飲陶藤條冷齋夜話蔡脈詩若把瓊根

養和扶老

中州集宇文虛中詩散步雙扶老持身一養和桑先生注云好問接養和九名見江湖散人集扶老見歸去來詞詩語本此

綦威卿毅挽辭

東海于門舊桐鄉邑墓遷

墓東海人威卿之祖待祠公鄉所州國家焉

芝蘭宜有種珠玉

自成淵慈母依鄰切名郎獲譽先豪華非日損信厚出天然
詣理言猶訥持心靜益專笑談千里到咳唾百金捐論齒推
子長垂髫得子賢通家仍孔李知己與王田刻責誰斯切推
扶最所偏孤嫠平日託昆季再生緣摧割詩寧寫精微夢或
傳都將百年淚一慟夜臺前

待制公

史祁宰傳恭嚴宰增也海陵疑奏疏戲為之。族帳部曲錄恭嚴字天錫山東膠東人少被剪亮特賜及第授應奉翰林文字葛王立遷待制。程史金

國正隆初海陵欲伐宋翟永固諫止之亮大怒拂袖起繼而召翰林待制恭嚴講漢史嚴及陸賈新語事亮怒稍霽日損老子為學日損益為道日損孔李

後漢孔王中州集王萬鍾字元卿秀容人父甫字用之通經史淳質有儒行亦以知賢

融傳見稱兄萬石字器玉住太學有賦聲用之妻死不更娶二子俱無家室井曰之事率親為之貧居陋巷中破屋蕭然不蔽風雨而弦誦之聲不絕也元卿少有逸才

讀書有後先不欲速成詩文閒適似其為人客至清談終日人不敢以俗事淹之與同郡田德秀齊名號王田評者謂規模宏博王不及田而瀟灑無塵土氣田亦非王比也

元卿父歿之後與其兄居于平晉之金城里明年兵復至兄被害元卿欲收葬之時游

騎充斥親舊勸勿往元卿持不可曰兄死不收留此身欲何用耶流出紫芝已昆季

涕而去尋亦被禍時人甚哀惜之元卿長子一月死時年二十七矣見一卷

新樂府恭君美東海名家大父內翰海陵朝以文章顯出刺吾州君美以蔭

補嘗令胡城晚得兒子石桂因賦朝中措詞案威卿與君美當屬昆弟行

老樹

老樹高留葉寒藤細作花沙平時泊雁野迥已攢鴉旅食秋
看盡行吟日又斜干戈正飄忽不用苦思家

陽翟道中

長路伶俜裏羈懷莽蒼中千山分晚照萬籟入秋風頻見參
旗縮虛傳朔幕空故園歸未得細問北來鴻

參旗

史記正義參旗九
星在紫西天旗也

月觀追和鄧州相公席上韻

歸潛志穆利懷遠粘合字延玉契丹
世襲猛安也弟兒俱好文穆府延致

名士初帥彭城雷希顏在幕楊叔能元裕之皆游其門一時士望甚重為將
鎮靜守邊不擾軍民便之天興東府知國亡率鄧州軍民詣宋人納款宋以
兵馬轉處之賜第居襄陽未幾病死。史補察官奴傳官奴敗走襄陽謀北
歸遠殺刺留哥入鄧說鄧帥粘合誨欲劫南軍為北歸計留哥以情告粘合
官奴繼以騎卒十餘入城議事粘合欲就襲城中擒之官奴馳還。武仙傳
天興二年三月仙以聖乘軍食不足徙軍鄧州仰給于鄧州總帥移刺瑗瑗
畏逼以女女仙仙不疑納之鄧州糧盡瑗終疑仙五月瑗舉城降宋瑗本名
粘合字延玉世襲契丹猛安累功鄧州便宜總帥既至襄陽使更姓名稱歸

正人劉介具將校禮謁制置使環大悔恨明年三月疽發背死。又見撤金
輦傳。烏古論黑漢傳。宋史孟珙傳紹定六年環遣部曲馬天章奉書請
降迎珙入城環伏階下請死珙為易衣冠以賓禮見。本集五卷送仲梁由
山八卷喜雨又謝辟又新野廟次韻十一卷巨然秋山又覓酒又夾谷碑新
倉記新樂府定風波詞注云鄂州漆水公壽
筵又水龍吟少年射虎云云同仲澤作並是

月觀知名舊池亭發興偏露涼驚夜鶴風細咽秋蟬綠泛兵
廚酒紅依幕府蓮無緣逐清景空羨飲中仙

兵廚

魏志阮籍聞步兵廚營人
善釀乃求為步兵校尉

太室同希顏賦

中州集雷淵九月登少室絕頂同裕之分韻得羅字詩
云閒居愛重九佳人重相過登高飭節物少室鬱嵯巖

迤邐謝塵土夷猶出煙蘿款如據鰲頭萬壑俯蜂窩浩浩跨積風瀾瀾渺長
河日車舛紅輪天宇凝蒼波指點數齊州始覺氛埃多我無倚天劍有濕空
湧沱驚鱗盼與浩倦翼占危柯悔不與家來結茅老巖阿歸途瞻老阮廣武
意如何案舊作九日少室集作太室無九日意知和詩兩不存也附錄雷詩
俟考

壯矣崧維岳盤盤上窈冥中天瞻巨鎮元氣有遺形雨入秦
川黑雲開楚岫青鼇掀一柱在萬古壓坤靈

送登封張令西上

本集寄英禪師詩云張侯詩最豪驚風捲汪瀾驚

中人即此案集中登封令有三此為張令十卷去思口號三十八卷頌並薛令又十一卷書生詩更笑登封武明府則又有武令矣

罷縣人稱屈悠悠復此行渭城秋照到秦嶺暮雲平道路衣從典風塵劍已鳴山西多俠客莫說是書生

方城道中懷山中幽居

地志南京路裕州方城縣

技拙違時用年飢與食謀江山貧士歎日月賈胡留楚客頻招隱文園故倦游衡門有幽事還我北窗秋

賈胡

後漢馬援傳伏波類西域賈胡到處輒止

招隱

文選招隱士序曰淮南小山之所作

孟州夾灘飲承之御史家

同欽叔作○地志河東南路孟州

美酒禁愁得芳梅發興饒紛紜聊且置硯磊故須澆雞黍成前約干戈有此宵平生楊大理惜不預佳招

雲卿赴召五日矣

雞黍約

東坡詩君歸趁我雞黍約賈田築室從今始

赴召

案歸志云正大初先君由葉令召入翰林

送曹吉甫兼及通甫

中州集劉少宜有傷曹吉甫死詩云官職雖低首不低爭教有志竟空預向人指畫將何語臥

壁糊塗不解題小女繞牀猶戲劇老兵伏地亦悲啼春風繫馬庭前樹只想東齋醉似泥

意氣羨君豪憐君屈騎曹安能事筆硯且復混弓刀風雪貂

裘暗關山馬骨高南飛見鴻雁應爲惜哀勞

騎曹

晉王徽之傳爲桓冲騎兵參軍冲問卿嘗何曹曰似是馬曹蘇軾詩仍呼騎曹爲馬曹

勝槩

三鄉作。地志南京路嵩州福昌縣三鄉鎮

勝槩煙塵外新詩杖履間偶隨流水去澹與暮雲還吾道三

緘口時情一解顏從今便高臥已負半生閒

三緘

家語孔子觀周廣有金人三緘其口而銘其背曰古之慎言人也

少室南原

地僻人煙斷山深鳥語譁清溪鳴石齒暖日長藤芽綠映高
低樹紅迷遠近花林間見雞犬直擬是仙家

寄贈龐漢茂宏

中州集龐漢字茂宏平晉人正大末年進士沈毅有志畧待次內鄉北山兵亂遇害

之子貧居久詩文日有功苦心唯我見高誼許誰同
萬里虎食肉一鳴雞長雄皇天老眼在且莫怨丘中

老眼

杜甫詩皇天無老眼空谷滯斯人

洛陽古城曦陽門早出

乘月出曦陽黎明轉北岡荒邨自雞犬長路足豺狼
天地憐飄泊風霜憶閉藏微吟訴行役淒斷不成章

聞希顏得英府記室

本集希顏募銘調徐州觀察判官召爲荆王府文學兼記室參軍。歸潛志興定末召爲英王

府文學又云移刺廷玉初帥彭城希顏在幕中州集劉遵卿寄陳正叔雷希顏詩東南形勝古徐州人物休誇第一流落落陳雷天下士故應連榻臥

黃樓。新樂府有送希

顏之官徐州滿江紅詞

近得髯參信知從苑游文星映朱邸勝槩減黃樓
進退存中道功名接上流徒懷貢公喜塵土隔瀛洲

髯參

世說衛玠多髯馬記室參軍王珣短小為主簿黃樓國訪予于彭城一日棹

小舟與頽長道攜盼英卿三子游泗水北上聖女山南下百步洪吹笛飲酒乘月而歸子夜著羽衣立于黃樓相視而笑以謂李白死世無此樂三百年矣

落魄

落魄宜多病艱危更百憂雨聲孤館夜草色故園秋行役魚
鱖尾歸期烏白頭中州遂南北殘息付悠悠

落魄

史記酈生傳食其好讀書家貧落魄無以為衣食業

得姪搏信二首

木集二十五卷元公銘以從孫好謀之子搏奉其後三十七卷集驗方引付搏拊輩使傳又南冠錄引云姪搏

俘繫之平陽存亡未可知案是詩殆作于平陽脫俘時耶

今日鄜州姪知從虎穴還百年陰德在幾日鬢毛斑隔闕家
仍遠羈棲食更艱誰憐西北夢依舊遶秦關
號驛傳家信坤牛玩吉占團圓知有望悲喜亦相兼過眼書
重展伸眉酒屢添關河動高興百遶望清蟾

團圓

杜甫得舍弟觀書自中都已達江陵今茲暮春月未行李合到夔州悲喜相兼團圓可望賦詩即事情見乎詞

阿千始生

案本集十二卷天壤詩注仙猶洞兒子叔儀呼猶應者又南冠錄引伯男于叔儀尚幼新樂府眼兒嬌詞阿儀醜筆學富家墓

銘子三人長口無奉直大夫汝州知州兼管諸軍兵務勸農事並是

四十舉兒子提孩聊自誇夢驚松出笋兆應竹生花田不求
千畝書先備五車野夫詩有學他日看傳家

長壽新居三首

同仲經賦

地古邨墟迥川迴縣郭斜蒲池餘老節菊水引新芽卜筮欣
成趣歸耕覺有涯迎門顧兒女今日是山家
隱去初心在親朋復此偕荒田歸別業高樹表新齋泉石深
三逕風塵限兩崖青山坐終日無物寄幽懷

新齋

案一卷有新齋賦

昔有姜夫子來家寂寞濱墓田畊已熟碑石字猶新詩酒娛

中歲山林有外臣三生可信否吾亦記前身

寬和中姜夢得處士常隱于此墓碣在焉夢得

曾上書仁宗既老以詩酒自娛
碣文說地名自鹿原長壽郡也

外臣

白居易詩漢客蒨綺爲
通客棄放與由作外臣

少林雨中

西堂三日雨氣節變蕭森偃臥復欹臥長吟時短吟鐘魚四
山靜松竹一燈深重羨禪棲客都無塵慮侵

十二月六日二首

偃鬼跳梁久羣雄結構牢天機不可料世網若爲逃白骨丁
男盡黃金甲第高閭門隔九虎休續楚臣騷

偃鬼

聽雨紀談人遇虎衣帶自別置于地
虎見人裸而後食之皆偃所爲也

天機

陰符經天發殺機日月薄
蝕地發殺機龍蛇起蟄

甲第

唐書論弓仁傳凡閱大小戰數
百無負賜寶玉甲第良田等

九虎

漢王莽傳拜將軍
九人皆以虎爲號

海內兵猶滿天涯歲又新龍移失魚鼈日食關麒麟草棘荒

山雪煙花故國春聊城今夜月愁絕未歸人

龍移

韓愈詩天昏地黑蛟龍移雷驚電擊雄雌隨清泉石文化為土魚龍枯死吁可悲

日食

淮南子麒麟門而日月食庚信詩門麟能食日戰交驚龍

得一飛姪安信

音問他鄉隔存亡此日知夢中憂凍餒意外脫艱危避地何
嗟及還家敢恨遲衰年吾事了似有鹿門期

鹿門

後漢逸民傳嚴公與其妻
子登鹿門山因采藥不返

短日

短日碁聲急重雲雁影深風霜侵晚節天地入歸心零落溝
中斷酸嘶繫下音五年朝與夕清血幾沾襟

溝斷

莊子比犧尊于溝中之斷
則美惡有間其失性一也

繫音

後漢蔡邕傳吳人有燒桐以繫音邕聞火烈
之聲知其為良木因謂裁為琴果有美音

送母受益自潞府歸崧山

李俊民鶴鳴集送母受益之洛陽詩云
有心待種洛陽田早趁西風送客船借

問梅花堂上月不
知別後幾回圓

薄俗科名賤孤生志願違正須謀獨往何暇計羣飛泌水眞堪樂荊州況可依青山吾舊隱此日羨君歸

獨往

淮南子山谷之人輒天下細萬物而獨往

羣飛

韓愈文一斥不復羣飛刺天

寄程孫鐵安

已見二卷詩

御史陰功在孫兒玉不如已能騎竹馬想亦愛銀魚異縣關山闊衡門骨肉疎幾時隨阿舅盡讀外家書

銀魚

白居易詩無那嬌癡三歲女繞腰啼哭覓銀魚

贈汴禪師

道重疑高蹇禪枯耐寂寥蓋頭茅一把繞腹篋三條趙子曾相問馮公每見招風波門外客無事且相饒

蓋茅

語見傳燈錄○王安石詩年多但有柳生肘地僻獨無茅蓋頭

繞篋

事見五燈會元○王庭珪詩且將肘束三條篋敢望腰纏十萬緡

趙

子

即元字愚之

馮公

中州集馮內翰壁元光間予在上龍潭每春秋二仲月往往與元雷游歷嵩少諸壑禪師汴公方事參訪每相遇輒揮毫賦詩以道閒適

之樂今猶夢寐見之兒子渭近以公故抵任城禪師附寄詩以敘曠昔未幾駐錫東
菴因造謁間出示裕之數詩醉筆縱橫亦畧道高遊舊事感歎之餘漫賦長句二首

已亥元日

五十未全老衰容新又新漸稀頭上髮別換鏡中人野史纔
張本山堂未買鄰不成騎瘦馬還更入紅塵

送楊次公兼簡秦彥容李天成

海國山如染雲堆草易荒時危頻虎穴路絕更羊腸吊影雙
蓬鬢攜家一藥囊殷勤秦與李無惜借餘光

虎穴

李白詩萬里橫戈探虎穴杜牧詩中原虎穴空秦彥容已見五卷別業注

發濟源

早曠今年劇他鄉底處歸羸糧失先具涉世本無機棄擲烏
皮几裴回白版扉殷勤雙語燕媿汝遠相依

烏皮几

杜甫詩錦官城西生事微烏皮几在還思歸

白板扉

王維詩雀乳青苔井雞鳴白板扉

倪莊中秋

已亥○案一卷移居云倪家蓮花白或卽此

強飯日逾瘦
袂衣秋已寒
兒童漫相憶
行路豈知難
露氣入茅屋
溪聲喧石灘
山中夜來月
到曉不曾看

答潞人李唐佐贈詩

聞道嗟予晚
求師愧子賢
泥途終自拔
璞玉豈虛捐
書破三千牘
詩論二百年
文章有聖處
正脈要人傳

陽興砦

亂石通樵徑
重崗擁戍城
山川帶淳朴
雞犬見升平
雨爛沙仍軟
秋偏氣自清
年年避營馬
幾向此中行

由州入府避騎兵
奔馬者多由此路

懷粹中

案粹中卽本庵已見一卷

醉解不復寐
吟君田舍詩
從知石門老
未比木庵師
日月淹書尺
江山入鬢絲
何因重談笑
却似少林時

同周帥夢卿崔振之游七巖

定襄七巖○周帥本卷西上詩九卷追賦牡丹及送詩卅七卷衛生方序

○振之見續夷堅志

客路頻年別僧居半日閒同游盡親舊舉目是家山世事風塵外詩情水石間悠然一尊酒落景未知還

送崔振之迎家汴梁

老伴不易得殘年惟有閑桑麻一邨落雞犬兩柴關樊守能供酒周侯許買山從今釣溪上日日望君還

樊守

案卽忻州州將樊天勝見後壽家記謝土詞

周侯

案卽上周帥夢卿

聚仙臺夜飲

永夜畱歡席高懷遠市塵月涼衣有露風細酒生鱗鄉社情親舊仙臺姓字新股勤詩卷在長記座中人

續陽平十愛

齊東沂州有鄭景純南河子十愛詞石刻

我愛陽平酒兵廚釀法新百金難著價一瓊卽醺人色笑榴

華重香兼竹葉醇爲君留故事喚作杏園春

案指紀子
正杏園

送田益之從周帥西上二首

市近廚無肉書香蠹有蟲深居誰不樂兀坐竟何功天日伸

眉後江山洗眼中蓬萊如可到剩借玉川風

有所謂

伸眉

漢書薛宣傳自圖進
退可復伸眉子後

洗眼

蘇軾詩雲水
光中洗眼來

一室盆歌後供樵只短僮求鳳可無日牧犢未成翁桂樹春

風近楊黃煖律通明年孟德耀應與伯鸞東

牧犢

古樂府牧犢子七十
無妻作雉朝飛操

九月晦日玉邨道中

水涸沙仍溼霜餘草更幽煙光藏落景山骨露清秋坐食知

何益行吟只自愁隨陽見鴻雁三歎惜淹留

十月四日往關南二首

短日晨光澹高風宿靄澄山寒渾欲雪水涸劣能冰振厲時

何有躋攀倦不勝哦詩聊自遣松液已香凝

予方醺松醪當以今日熟故及之

行路見新月獨行還獨謠勞生塵衮衮晚色鬢蕭蕭野曠無
遺穗林疎有墮樵迴頭麥山嶺更覺馬蹄遙

墮樵

王安石詩稚子松間拾墮樵

寄王丈德新一首

德新時在汝州○中州集王主簿革字德新一名著臨濟人以蔭補官祿篋庫餘三十年正大中以六

赴庭試賜出身調宜君簿爲人有蘊藉善談笑密公與之唱酬相得甚歡初在太原作詩有赤心禮白眼笑面得嘖拳之句公甚愛之有詩寄之云柳塘雲館千鍾酒笑面嘖拳五字詩蓋志此及第後呈同年云孤身去國五千里一第遲人四十年大爲閑閑所裕德新交游滿天下獨許欽叔與予爲莫逆云年七十八終于雲中○歸潛志王革字德新宏州人少有才思詩學尖新風流人也屢舉不第以任子仕晚由恩得宜君簿北渡居雲內後遷雲中卒年七十餘名士皆其友也尊酒之間一談一笑甚有前輩風今不復見矣戊辰冬赴試西京自以年高與諸後進偕入復作此舉因有詩云懶觀蒼龍曉漏鐘受恩曾入大明宮香浮屣影迎初日人逐鞭聲靜曉風轉首俄驚成異世此身雖在已衰翁喚回五十年前夢再著麻衣待至公○案注云汝州當

師主宜君薄時。河汾詩麻信之爲王德新詩百年人物惜凋零尚喜衣冠見老成數日米鹽憂桂玉一川風雨獨柴荆紅顏未羨方春好黃髮應從此夜生異日華林講殊禮不妨鳩杖送公行。湛然集有德新先生惠然見寄佳製二十韻和而謝之詩乙未閏月上休日、新樂府一卷賦德新王丈玉溪水調歌頭詞又赴召史館與德新丈別于岳祠西新店明日以此寄之石州慢詞二卷飲昆陽官舍有懷德新丈臨江仙詞又寄德新丈臨江仙詞三卷寄德新丈江城子詞又夢德新丈因及欽叔河山亭倚游江城子詞

沙際春還去雲頭雨不成興來誰共醉事往獨含情紫邏留

行客黃流隔戍城岸花何處在空憶權歌聲

孟津時事

紫邏

太平寰宇記廢臨汝縣在汝州西東漢梁縣地唐先天二年割置縣于今縣西之紫邏川。地志南京路汝州梁縣有紫邏川

清汝風華地平生記此游酒能千日醉春必萬金酬攬鏡非

遲暮逢花儘滯留只應歌笑處偏欠李鄜州

欽叔時赴鄜州幕官

舊國

舊國分崩久孤兒展省初客衣留手線驛傳失肩輿夢拜悲兼喜心飛疾亦徐殷勤南去雁先爲到商於

展省

案此爲乙巳年往河南舉太夫人旅殯時作

和仲梁

林影兼秋薄雲陰帶晚涼石潭魚近藻沙渚雁含霜笑語無
長路登臨豈異鄉一尊堪共醉惜不是重陽

一作雁留霜

甲辰夏五月積雨十餘日不止遣悶二首

甲子霖霖雨巡簷悶不禁幻泡成實相水樂激哀音瘴海聞
天漏堯年見陸沈騫飛想雲表癡坐若爲心

南史王褒文傳人居貴要但問心若爲耳

幻泡

法華經如夢幻泡影如露亦如電

天漏

寰宇記卽都縣漏天秋夏常雨蘇軾廣州詩百尺飛濤瀉漏天

甲子霖霖雨農郊搏手空排牆寧有禮爲壑竟何功戰蟻侯
王上鳴蛙意氣中掃晴應曉夕少忍待秋風

排牆事見王衍論云排牆之塵猶有禮也

陽泉棲雲道院

方外復方外翛然心迹清開窗納山影推枕得溪聲川路遠

誰到石田平可畊
霜林不嫌客
留看錦崢嶸

心跡

杜甫詩心跡喜雙清

劉子中夢庵

已見四卷新居注

寤寐生與死
幻歟爲是真
如何夢中境
不屬覺時人
朝徹從渠夜形開
亦此神殷勤
花上蝶分我
漆園春

夢覺

元稹詩人生同大夢夢與覺誰分

丙午九日詠菊二首

秋菊有何好
祇緣風露清
花中誰比數
霜後獨鮮明
九日惜虛過一尊
還自傾今年
病居士吟繞
更關情
几案得新供
小窗幽更宜
風霜寧小怯
根撥要深移
黃素金行正芳
甘藥品奇三
薰復三沐
歲晏與君期

感事

壯事本無取老謀何所成人皆傳已死吾亦厭餘生潦倒封侯骨淹留混俗情百年堪一笑辛苦惜虛名

壯事

國語卻叔虎曰既無老謀又無壯事何以事君

人皆二句

初曰云東坡四六語

酬中條李隱君邦彥

本三十一卷藏雲表云丁未春芮城李邦彥過吾州即此

州路限南北相逢今白頭蟲沙非故國人物自名流學道慚

高步留詩惜暗投歸秦如有便終伴竹林游

邦彥自關中徒步省其季父于集常故有竹林之句

蟲沙

抱朴子周穆王南征三軍之衆一朝盡化君子為猿為鶴小人為蟲為沙

集寧

地志西京路撫州集寧縣

送邦彥北行

比數推前輩陪從結後緣川涂即睽隔詩酒重留連白鶴歸

華表青牛得老仙秦山好行腳倚杖待明年

紫微劉丈雅有游秦之興故篇中有及

青牛

關中記老子成關令尹喜勸門吏曰若有老公從東來乘青牛蒲板車者勿聽度關

同冀丈明秀山行

暮景披橫幅山間二老同雲如愁成苦雪亦笑詩窮古木凍
欲折斷崖行復通從今胡谷夢時到水聲中

同姚公茂徐溝道中聯句

元史姚樞傳字公茂柳城人後遷洛陽少力學有王佐略辛丑爲燕京行臺郎

中時牙魯五赤惟事貨賂以樞幕長分及之樞一切拒絕因棄官去攜家來
輝州作家廬別爲室奉孔子及宋儒周惇頤等像刊諸經惠學者讀書鳴琴
者將終身世祖在樞即道趙璧召樞至大喜待以客禮案聯句時或卽辛丑
棄官後卽餘許九卷答詩注○楊奐還山稿呈公茂詩冰雪相看十五年照
人寸采只依然我今自分蓬蒿底君獨何心道路邊渭北幾時無夢寐終南
是處有林泉不妨便作求田計伴取疲揚草太元○中州集宋九嘉有留別
詩在許州時作○地志河東北路太原府徐
溝縣本清源縣之徐溝鎮大定二十九年升

路轉川塗闊天低雨氣昏綿山連漢壘汾水入并門姚公茂來往
頻鞍馬登臨負酒樽聯詩強一笑悽絕恐銷魂元裕之

壬子月夕

明月復明月今年還遠遊關河動歸興時節重離憂老眼耿
無寐病身偏覺秋遙憐小兒女把酒望東州

遙憐少陵句

庚子三月十日作

殘夢忘書帙餘寒殢酒杯青銅元懶照白紵更寬裁水際時
獨往花邊知幾迴殷勤雙語燕應自謝家來

七月十六日送馬揚善提領關中三教

湛然集和馬揚善九日韻詩馬君今歲又

離家攜手虞酬海一涯秦漢興亡真夢寐蘇軾軻莫吁嗟孔融座上尊盈酒靖節雞邊菊有花何日公餘同此樂西風一醉況流霞又和詩略云我愛馮公子孔教窮高堅愛道不憂貧一室如盤縣却喚庠序生促薦徒備員詩書貯便腹一斗吟百篇遠蹈顏孟跡近比蘇黃肩又云先生謁承明百里來秦川徒步沙磧中往復幾年襟卷說易傳應詔命席前

爲愛秦中好西遊日苦遲青雲動高興白首得新知道在貧
何病官閒老更宜相思詩酒社無計與追隨

青雲少陵句

京兆漕司官居三首

新樂府有漕司西齋謁金門詞

符節推通貴江山入勝游名園隨地改高棟與雲浮簿領歸
閒暇鶯花接獻酬不知秋夜月何似庾公樓

通貴

杜甫詩天子歎通貴雲泥相望懸

庾公樓

文詩池要山簡馬月靜庚公樓

複嶺雲橫野孤峰玉柱天遙知開館日別破見山錢夢出紛
華外詩來寂寞邊亭中誰舉酒高興想悠然
聞說梅軒好長吟有所思入簷看瘦影挂月見橫枝東閣今
于載風流彼一時西游曾有約到日更題詩

東閣

杜甫詩東閣官梅動詩興

甲寅正月二十三日故關道中三首

劉效祖四鎬三關志故關東至井陘縣四十里

西至平定州八十里南至泉木頭口六十里北至娘子關二十里

雪碣不得過陽坡如見留林煙常暗淡木葉自颼颼齒髮悲
行役驚花惜舊游塵埃與風雨看待幾時休

千里不易到三冬須少留居情猶晉產去意已離上遠出每
爲苦雄夸還自羞君心未肯在應待肯時休

六十復半十年年添白頭祇知詩遣興未覺酒忘憂人七因
循過元宵塊坐休殷勤行記上今日是東州

送閻子實焦和之北上

秋澗集送焦和之西夏行省永龍吟詞云當年紫禁烟花相逢恨不知音早秋風倦客一

孟情話爲君傾倒回首燕山月明庭樹兩枝口繞正情馳魏闕空書恠事心
胆墮傷殷浩禍福無端倚伏問古今幾人明了滄浪漁父歸來驚笑雲均枯
稿遲延淇南歲寒獨在故人襟抱
恨黃塵障盡西山遠日送斜陽道

秦府賢初聚瀛州路不遙謨謀在廊廟物色到漁樵布褐豈
終隱旌車行見招春風兩黃鵠老眼看雲霄

庫城

浩浩庫城水岸高知幾尋疎林護懸險絕壁入清深跼步無
曠迹勞歌惟苦音年年一來此老我亦何心

婁生北上

并府虛荒久大城如廢邨艸茅知世故泉壤隔天關六月甘霖浹一言陰理存明年佩符節知有奉春孫

奉春

漢書襄陽傳封奉春君

遣興

几案滿書史欣然忘百憂一篇詩遣興三醖酒扶頭千載陶元亮平生馬少游但留強健在老矣復何求

扶頭

白居易詩一橫扶頭酒即拾遺王璽

八月并州雁

三鄉時作

八月并州雁清汾照旅羣一聲驚晚笛數點入秋雲滅沒樓中見哀勞枕畔聞南來還北去無計得隨君

示白誠甫

案廿四卷白公表男孫名忱或即此

之子吟爆竹適公欣樹萱崑山多美玉江水發初源名教有
樂地詩書皆雅言通家吾未老倚杖望高軒

樂地

晉樂廣傳常曰名教中
自有樂地何必乃爾

高軒

李賀有高
軒過詩

甲寅十二月四日出鎮陽寄宰魯伯

秋澗集碑陰先友記宰
沂字魯伯洛陽人才長

氣象抱負奇節常與中書楊惟中說降西山主帥時人壯之後為王府徵士
○元文類姚燧送宰先生序云先生之至不嫌于自明曰向之儒服登常山
一言折猖狂之盜而落其角距者實子曰彼有聞而不奇先
生者乎○陵川集鄉野堂記乙巳秋魯伯自燕來云云即此

潯水曉光動灞橋詩境同衝寒騎瘦馬認影識衰翁長路風
聲裏孤城雪意中迴頭歌笑處淒絕意何窮

灞橋

全唐詩話相國鄭綮善詩或問近有新詩否曰
詩思在灞橋風雪中驢子背上此何以得之

送文生西行

今夜東山月隨人知幾程從軍少年事分手故鄉情渭水風
露早秦川煙樹平相招有仙掌無計與君行

仙掌

國史補張燕公華岳碑云曉曉太華柱天直上青崖白谷仰見仙掌

乙卯十一月往鎮州

邨靜鳥聲樂山低雁影遙野陰時澗朗冷雨只飄蕭涉遠心
先倦衝寒酒易消紅塵忘南北渺渺見長橋

贈祖唐臣

以下續編

詩道壞復壞知言能幾人陵夷隨世變巧偽失天真鬼蜮姦
無盡優伶伎畢陳謗傷應皆裂落褻亦肌淪珉玉何曾辨風
花祇自新憐君用幽意老矣欲誰親

挽趙參謀二首

本集龍山新榮碑歲癸酉明年正月破北京龍山降今真定縣工匠都總管趙侯振玉在籍中途隸金紫公幕下已

丑十月改河北西路按察使兼帥府參謀又真定府學記王以丁未五月召參佐張從輝問及鎮府府學德輝言府學廢久矣今本路工匠總管趙振玉方嘗葺之○張耀卿中州集後序已酉秋得真定提學龍山趙侯國寶資藉之始鐫木以傳

偃息參戎幙敦龐一褐寬儒宮親俎豆賓楊老衣冠石動心

寧轉河清笑自難殷勤題畫像留與後生看

一本作典刑看

篇什中州選兵間僅補完風人定誰采墨本賴君刊雅道湮

沈易幽光發越難高門有孫息玉立看儒冠

嗣侯大總管哀挽二首

案嗣侯早卒考元史耶律楚材子鐸張柔子宏略史天倪子楫構樞密實子忠滿趙天錫

子實亨等傳俱不合本集東平碑實長子忠貞前公卒非嗣侯亦未是惟史邦和上拔抑長子天益為太原路都總管及本集喬子戶碑惟忠長子珪賢聯然皆不載卒年未知此挽者究屬何人

北俗資財勁將軍迴不羣賓筵推雅量戰艦望奇勲運隔黃

圖日神馳紫塞雲祗應吳季子撫樹惜徐君

黃圖

杜甫詩臺閣黃圖裏

紫塞

古今注秦築長城土色紫漢塞亦然一云雁門山皆色紫故云

倚伏難前料乘除忌早成老親如宿昔世德見哀榮劍鬱雙

龍氣碑留九虎名感歌凡幾解千載賁佳城

答弋唐佐

德山人有志道學

遭亂無安地分憂得若人鄉鄰存世譜骨肉到情親信默餘
天粹咀嚙有道真懷哉沂水上同詠舞雩春

不寐

不寐復不寐悲吟如自讐雞棲因失曉蟲語苦爭秋日月虛
行橐風霜入敝裘誰憐庾開府直欲賦澆愁

澆愁

李觀詩登臨嘆暇
日喚客共澆愁

送楊叔能東之相下

海內楊司戶聲名三十秋文高徒自苦食盡與誰謀老檣風
霜飽芳蘭澗壑幽東游無可慮敬客有蕭侯

元遺山詩集箋注卷七終

元遺山詩集箋注卷八

烏程

施國祁北斲箋

蔣炳枕山校

七言律詩

秋懷

崧山中作

涼葉蕭蕭散雨聲
虛堂淅淅掩霜清
黃華自與西風約
白髮先從遠客生
吟似候蟲秋更苦
夢和寒鵲夜頻驚
何時石嶺關頭路
一望家山眼暫明

帝城二首

史院夜直作○案本集三十三卷吏部警巡二記竝云正大二年五月儒林郎權國史院編修知先生元年五月應詞科後即

直史院至二年六月即自史院告歸詩有半夜商聲之句可定爲元年秋作也惟七卷阿千始生詩云四十舉兒子而先生是年僅三十五歲乃有頃遺兒書一語殊不合俟考○新樂府有史院夜直水調歌頭詞意同

帝城西下望孤雲
半廢晨昏媿此身
世俗但知從仕樂
書生

只合在家貧悠悠未了三千牘碌碌隨十九人預遣兒書
報歸日安排雞黍約比鄰

三千牘

漢東方朔傳朔初上書凡用三千奏牘

十九人

史平原君傳毛遂左手持盤血右手招十九人曰公等碌碌所謂因人成事者也

羈懷鬱鬱歲駸駸擁褐南窗坐晚陰日月難淹京國久雲山
惟覺玉華深鄰邨爛漫雞黍局野寺荒涼松竹林半夜商聲
入寥廓北風黃鵠起歸心

雞黍局

蘇軾詩願同荔支社長作雞黍局

僕射陂醉歸卽事

案陂在鄆州後魏賜僕射李冲因名見玉堂閑話

多生曾得江湖樂每見陂塘覺眼明詩酒共尋前日約風陰
新自夜來晴春波澹澹沙鳥沒野色荒荒煙樹平醉踏扁舟
浩歌起不須紅袖出重城

是日招樂府不至

春日

里社春盤巧欲爭裁紅暈碧助春情忽驚此日仍爲客卻想當年似隔生貧裏蒸鹽憐節物亂來歌吹失歡聲南州剩有還鄉伴戎馬何時道路清

歐陽詹春盤賦裁紅暈碧巧助春情爲韵

春盤

四時寶鑑立春日唐人作春餅生菜號春盤杜甫詩春日春盤細生菜

橫波亭

爲青口帥賦○史章紀泰和六年十月紇石烈子仁兵出青口宣紀興定二年二月宋人侵青口敗之五年七月詔增給徐州青口

等處戍兵衣糧哀紀正大二年禁宿泗青口巡邊官兵毋復擅殺過淮紅衲軍七年五月詔釋青口宋敗軍三千人○案此帥卽移刺粘合詳七卷月觀注

孤亭突兀插飛流氣壓元龍百尺樓萬里風濤接瀛海千年豪傑壯山丘疎星澹月魚龍夜老木清霜鴻雁秋倚劒長歌一杯酒浮雲西北是神州

百尺樓

魏志陳登傳許汜曰昔見元龍自上大牀卧使客卧下牀劉備曰卿求田問舍言無可奈如人卧百尺樓上卧君于地何但上下牀之別耶

魚龍夜

杜甫詩水落魚龍夜山空鳥鼠秋 神州 河圖括地象崑崙東南地方五千里名曰神州

野菊座主閑閑公命作

歸潛志正大初趙閑閑長翰苑同陳正叔潘仲明雷希顏元裕之諸人作詩會嘗賦

野菊趙有云岡斷秋光隔河明月影交荒叢蟋蟀病葉挂蠨蛸欲訪陶彭澤柴門何處敲諸公稱其破的也○盜水集野菊詩離離巖下菊無主混蓬芽路漸秋光隔山明月影交荒叢蟋蟀寒葉挂蠨蛸擬訪陶廬飲柴扉何處敲案二詩小異○木集九卷有再奉命作

柴桑人去已千年細菊斑斑也自圓共愛鮮明照秋色爭教
狼藉卧疎煙荒畦斷壠新霜後瘦蝶寒蛩晚景前只恐春叢
笑遲暮題詩端爲發幽妍

度大白嶺往昆陽

辛氏三秦記太白山在武功縣南去長安三百里

斷崖絕壁裂蒼頑竟日長林窈窕間舊許煙霞歸白髮悔隨
塵土出青山飢蠶澱澱催人老野鶴昂昂羨汝閑畏景方隆
路方永南風迴首暮雲還

寄希顏二首

案後一首希顏在徐州幕時作詳七卷記室詩注

僵卧崧丘七見春商餘歸計一塵新悠悠華屋高貴意元元

田夫野老身動色雲山如有喜忘機鷗鳥亦相親
龕疎潦倒今如此樓上元龍莫笑人

湖海故人仍騎曹彭門千里入憑高山頭杜甫長年瘦樓上
元龍先日豪水落魚龍失歸宿天長鴻雁獨哀勞酒船早晚
東行辦共舉一杯持兩螯

酒船

晉書畢卓傳嘗曰得酒滿數百斛船四時甘味置兩頭右手持酒杯左手持蟹螯拍浮酒池中便足了生

懷益之兄

時在閬鄉
○詳七卷

牢落關河雁一聲千戈滿眼若爲情三年浪走空皮骨四海
相望只弟兄黃耳定從秋後到白頭新自夜來生西樓日日
西州道欲賦窮愁竟不成

空皮骨

杜甫詩三年奔走空皮骨始信人間行路難

黃耳

晉陸機傳有駿犬名黃耳甚愛之時寓京師久無家問笑問犬曰汝能取消息否犬

搖尾作聲乃爲書以竹箭盛之係其頸犬尋路南走至其家得報還洛

昆陽二首

本集三卷後招飲詩云今年得田昆水陽卽此案二詩非一時作○歸潛志云先子翰林令葉時同郝坊州仲純賦昆陽懷

古詩諸公多繼作先子有云營屯潢水橫陳處計墮劉郎小怯中天上風雲掃妖氣人間虎豹長真龍千秋一片昆溪月曾照堂堂蓋世雄郝云戰骨至今埋潢水暮雲何處是春陵李長源云潁川南下鬱坡陀遐想當年戰壘多自是真人清宇市誰爲稚于試干戈元裕之云英威未覺消沉盡試向春陵望懿王飛伯云落日一川英氣在西風萬葉戰聲來誰倚城樓吊興廢一聲長笛暮雲開史學優李欽叔白文舉皆有詩于亦作一古詩也宋志引先生英威二句集中失載全詩是二首亦非和懷古之作又劉郝李王史諸人詩中州多不錄卽欽叔昆陽元夜詩亦別一作○新樂府有昆陽官舍臨江仙詞

古木荒煙集暮鴉
高城落日隱悲笳
并州倦客初投迹
楚澤寒梅又過花
滿眼旌旗驚世路
閉門風雪羨山家
忘憂只有清樽在
暫爲紅塵拂鬢華

投跡

群嘲欲步者擬足而投跡

去日黃花半未開
南來忽復見寒梅
淹留歲月無餘物料
理塵埃有此杯
老馬長途良憊矣
白鷗春水亦悠哉
商餘說有

滄洲趣早晚乾坤入釣臺

老馬

杜甫詩古來存老馬不必取長途

滄洲

謝朓詩既儻懷祿清通協滄洲趣

寄西溪相禪師

詳三十一卷墓銘

青鏡流年易擲梭壯懷從此卽蹉跎門堪羅雀仍未害釜欲生魚當奈何萬事自知因嬾廢一官元不校貧多拂衣明日西溪去且放雲山入浩歌

嬾廢

春渚紀聞東坡先生與張質夫帖云其近者百事嬾廢惟作墨本頗精

葉縣雨中

時終前旱尤甚

春旱連延入麥秋今朝一雨散千憂龍公有力迴枯槁客子何心歎滯留多稼卽看連楚澤歸雲應亦到崧丘兵塵浩蕩乾坤滿未厭明河拂地流

千憂

杜甫詩濁憂誰造汝一酌散千憂

寄答趙宜之兼簡溪南詩老

中州集趙宜之次韻裕之見寄二首云魚入深淵鵲在陰飛潛何幸

遠庖砧乾坤萬里雲無跡冰雪三冬柏有心故國勾留清夜夢歲華分付白頭吟幸川擬作桃源隱共與青山閑古今古屋幾幾四壁塵不堪幽獨足吟呻瓶儲看客常年慣家具爲農近日新世味飽書惟可睡詩情漫若不醫貧相從分我西山半欲乞羅元伴老身案宜之次韻二首集中惟見陰韵一詩後十卷內追錄舊詩之一爲塵韵似爲次答之作第據彼詩末注云自用的答張之純且詩語亦無寄趙簡辛之意則遺山竟佚塵韵一矣

窗影朧朧納暝陰風聲浩浩急霜砧秋鴻社燕飄零夢潁水
崧山去住心黃菊有情留小飲青燈無語伴微吟故人憔悴
蓬茅晚料得老懷如我今

暝陰

唐彥謙詩春雲更惹愁于我閒蓋低村作暝陰

去住心

張元幹詩精舍經行地征人去住心

潁亭

潁上風煙天地迴潁亭孤賞亦悠哉春風碧水雙鷗靜落日
青山萬馬來勝槩消沈幾今昔中年登覽足悲哀遠游擬續

騷人賦所惜忽忽無酒杯

春風二句

又見張希孟會波樓詩顧氏云

山中寒食

小雨斑斑浥曙煙平林簇簇點晴川清明寒食連三月潁水
崧山又一年樂事漸隨花共減歸心長與雁相先平生最有
登臨興百感中來只慨然

楚漢戰處

同欽叔賦○中州集李欽叔崇陽古城登覽寄裕之云夾元高臺上古城登臨人境兩峰嶺關河落日歲云暮草木凌風獵未

平虎擲龍挈王伯事天荒地老古今情舉盃欲洗興亡恨為嘆窮途阮步兵案阮步兵指先生與辛敬之詩青雲一別阮家郎同意

虎擲龍挈不雨存當年曾此賭乾坤一時豪傑皆行陣萬古
河山自壁門原野猶應厭膏血風雲長遣動心魂成名豎子
知誰謂擬喚狂生與細論

虎擲龍挈

喻汝礪詩龍挈虎擲堆胸臆

賭乾坤

韓愈詩誰勸君王同馬首真成一擲賭乾坤

壁門

史記周勃世家亞夫

傳言開 豎子 晉阮籍傳登廣武觀楚漢戰處
歎曰時無英雄遂使豎子成名

懷叔能

別卻楊侯又一年西風每至輒淒然酒官未得高安上詩印
空從吏部傳三沐三薰知有待一鳴一息定誰先黃塵憔悴
無人識今在長安若箇邊

高安

蘇軾詩高安酒官雖未
上兩腳垂欲穿塵泥

長安

本集三十六卷小亭集引云將游
關中諸公長詩贈別開闢作引

留別仲澤

中州集王右司惺字仲澤以字行與定二年進士調管州司候
不赴潯州防禦使邦獻商州防禦使國器武勝節度使廷玉愛

其才連辟三府經歷官在軍中凡十年舉軍陵令未赴丁太夫人憂廬墓
三年服除復授寧陵正大七年朝廷與宋人議和擇可為行人者仲澤以
才選凡再至揚州制司宋人愛其才有中州豪士之目使還以寧陵課最
遷一官入為尚書省掾三月即授太學助教充樞密院經歷官八年院廢
權右司郎中中牟失利不知所終仲澤博通經史有文采善議論工書法
妙于琴事詩其專門之學人物楚楚若素宦于朝吏事則與龔京父相上
下其辨博又屏山所許天下談士三人之一也○歸潛志王涯仲澤後名
仲澤太原人家世貴顯少游太學有詞賦聲譽中高選南渡後擢第為時
帥與屯邦獻完顏斜烈所知故多在兵間後辟令寧陵有治績召為省掾
因使宋至揚州應謝華敬宋人重之同為太學助教充樞密院經歷官俄

遷右司都事稍見信用天興改元從赤蓋合喜提兵出援武仙鄭州西遇
北兵大戰歿于陣性明敏不拘博學無不通長于設論使人聽之忘倦工
尺牘字畫遺美有晉人風作詩多有佳句○中州集王琦傳行尚書省左
右司郎中仲澤其從孫也○張大節傳好獎進士類洽州徐驪太原王澤
大興呂造經其指授卒成大名○潘水集裕州學記正大二年以內族公
某爲之刺史其從事太原王涯○中州集王仲澤送裕之還嵩山詩高懷
不受簿書侵清穎鷗盟欲重尋老去宦情如我薄閑來道念見君深對牀
夜雨他年夢滿馬西風此日心嵩頂勝游誰得其仲聞仙馭待知音案送
詩卽次此詩韵○木集二卷九日詩語本卷丹霞同賦九卷四長十一卷
內艱十二卷圖詩注二十七卷長佐碑中州樂府有從南師國器獲同裕
之賦水龍吟詞新樂府同國器師長佐仲澤置
酒南陽故城三莫子詞又從從同賦水龍吟詞

避俗無機日見侵
逐貧不去巧相尋
半生與世未嘗合
前日入山唯不深
綠水紅蓮慙大府
清泉白石識初心
相思命駕非君事
能寄詩來或賞音

逐貧

漢揚雄有賦

相思

晉嵇康傳東平呂安服康高致每一相思千里命駕

鄭州上致政賈左丞相公

時被命就公訪先朝逸事○中州集賈左丞益謙字亨甫宣宗朝參知政事山

知濟南移鎮河中南渡後召拜左丞尋致仕居鄭州哀宗卽位史官乞因宣廟實錄遂及衛紹王初虎賊既弒逆乃立宣宗宣宗之人至謂衛王失

道天命絕之虎實無罪且於主上有推戴之功獨張信甫上章言虎賊大逆不道當用宋文帝款傳亮孫羨之故事草奏不報尔後舉朝以大安崇慶之事為諱及是謂耳南大安中嘗拜御史中丞宜知衛王事乃差編脩官一人就訪之亨甫知其旨謂來者言知衛王莫如我然我聞海陵弑而世宗皇帝立大定三十年禁近能暴海陵盤惡者得美仕史官修實錄誣其淫毒狼鷺遺臭無窮自今觀之百可一信耶衛王勤儉慎惜名器較其行事中材不能及者多矣吾知此而已設欲飾吾言以實其罪吾亦何惜餘年朝議偉之正大三年八十歲案文又詳三十四卷東平千秋記○又贈答史院從事詩見說才名自妙年多慙政府舊妨賢物華天寶無今古鳳閣鸞臺孰後先鄭圃道尊何敢望濟南書在子當傳莫言老眼昏花滿及見風鵬上九天案賈詩

即答此詩意為正大元年作

黃閣歸來履舄輕天將五福界康寧四朝人物推耆舊萬古清風在典刑鄭圃亦能知有道漢庭久欲訪遺經帝城此後瞻依近長傍孤南候極星

鄭圃

列子居鄭圃四十年人無識者

遺經

漢儒林傳孝文求能治尚書者伏生老不能行詔太常使掌故臚錯往受之

寄答景元兄

故人相念不相忘頻著書來約對牀甚喜樵夫與爭席所憂

簿吏復登堂春風和氣隨詩到洛水泰山引興長奮袖高談

夜窗白幾時危坐聽琅琅

景元去歲大為催科所困

對牀

韋應物詩字知風雪夜復此對牀眠

簿吏

李賀感諷詩句

寄辛老子

草堂西望渺煙霞夢寐西南一徑斜為羨鸞凰安枳棘悔將
猿鶴入京華百錢卜肆成都市萬古詩壇子美家後日從翁
問奇字可能逋客待侯芭

枳棘

後漢仇香傳枳棘非鸞鳳所栖百里非大賢之路

卜肆

漢王貢傳序君平卜筮于成都市日閱數人得百錢足自養則閉肆下簾而授老子

子美

杜牧詩今代風騷將誰登李杜壇

百錢二句

案重見九卷追懷詩

後灣別業

薄雲晴日爛烘春高柳清風便可人一飽本無華屋念百年
今見老農身童童翠蓋桑初合濫濫蒼波麥已勻便與溪塘

作盟約不應重遣濯纓塵

劉丈仲通哀挽

拙宦深辜遠業期無兒更結下泉悲溫純如此豈復見報施
言之尤可疑四葉名家今日盡百年潛德幾人知元劉交分
平生重才薄猶堪第二碑

第二碑

劉禹錫詩朔方徙歲行
將晚欲爲君刊第二碑

會善寺

中州集馮叔獻同裕之再過會善有懷希顏詩寺元魏雕宮十日
來凡兩前與髯卿偕齋真少林往其時已薄暮諸勝不暇訪今同

魏諸孫再到風烟上寺僧漂升殿雄深肅瞻仰柱礎門限砧追琢成大壯
不見磨琢痕瑩滑明晃朗摩挲三太息後世無此匠晚登西南亭碧玉對
千丈如王宮天柱如太華仙掌宿宿贊公房秀色夢餘想夜靜耿不眠泉
溜琴筑響惜聲竟不來聯詩其清賞○本集十一卷有同希顏欽叔玉華
谷還會善
寺卽事詩

白塔沈沈插翠微魏家宮闕此餘基人生富貴有遺恨世事
廢興無了期勝槩只今歸鶯嶺煙花從昔繞龍墀長松想是

前朝物及見諸孫賦黍離

鷺嶺

陰鏗詩鷺嶺春光遍虞世基詩鷺嶺訪三碑

長松

中州集馮璧雷淵竝有會善寺性松詩

諸孫

案先生為拓拔氏後

寄欽用

中州集李獻甫字欽用欽叔從弟也兄欽止欽若皆中朝名勝家故將種而同時四進士人門之秀照映一時欽用博通書傳于左

傳及地理之學為精為人有幹局心所到則絕人遠甚故時人有精神滿腹之目歷成陽簿辟行臺掾屬正大初使夏預行錄功授慶陽總帥府經歷官尋辟長安令京兆行臺所在其須之繁急于星火欽用所以處之者常若有餘縣民賴之以安入為尚書掾王辰之兵奏充行六部員外郎守備之策時倚任之以功遷鎮南軍節度副使兼右警巡使車駕東巡死于蔡州之難時年四十所著詩文號天倪集者爾京師欽用死其家亦破并同年華陰王元禮購得之幾有人聚俱亡之恨然則文字語言之存與否亦有數存于其間耶○本集六卷探花詞注十二卷聞歌詩語二十五卷贊皇銘新樂府有方城軍中寄同年李欽用欽用時為西臺掾在長安滿江紅詞又送欽用官長安令詞又欽叔欽用避兵太華絕頂以畫見招因為賦此念奴嬌詞又壬辰圍城中有懷浙江別業為欽用弟賦玉漏遲詞又孟津官舍寄欽若欽用昆弟并長安故人木蘭花慢詞

顛顛京華背荷樂南山歸興夜漫漫長門有賦人誰買坐榻無氈客益寒蟲臂偶然煩造物驛頭何者亦求官故人東望應相笑世路羊腸乃爾難

坐氈

南史江革傳謝朓候革時大寒雪見革弊絮單席而好學不倦乃割半氈與充卧具

驪頭

唐李揆傳苗晉卿數薦元載揆輕載地寒曰龍章鳳

姿之士不見用驪頭

鼠目子乃求官耶

楊之美尚書挽章

中州集禮部楊公雲翼傳字之美樂平人明昌五年經義進士第一人詞賦亦中乙科天資穎悟博

通經傳至于天文律歷醫卜之學無不臻極事母孝與人交款曲周密處事詳雅而能以大節自任南渡後二十年與禮部開闢公代掌文柄時人號楊趙宣宗頌歲南伐事勢有決不可者論議之際時相多以避嫌不敢言公獨直言極諫以為南淮生靈皆陛下赤子不能外禦北兵而取償于宋以天下為度者不如是也是後再出兵時全一軍幾為宋人所覆宣宗悔悟責主兵者曰我當何面目見楊雲翼耶興定未拜吏部尚書中外望其旦暮入相竟以足疾不果正大五年八月終于翰林學士年五十九諡曰文獻天下識與不識皆哀惜之至今評者以為百餘年來大夫士身脩四科者惟公一人而已子恕字誠之第進士今在燕中

冠蓋龍門此日空人知麟出道將窮景星明月歸天上和氣

春風在眼中千古孫劉有餘責一時燕許更誰同受恩知己

無從報獨為斯文泣至公

龍門

南史袁昂傳昂雅有人鑒游處不雜八其門者號登龍門

景星

史記天官書景星常出子有道之國正義曰狀如半月生于晦朔助月為明也

孫劉

南史顧觀之傳蔡興宗嫌其風節過峻曰燕許唐書蘇頌傳自景龍後與張說辛毗有云孫劉不過使我不為三公耳

李屏山挽章二首

中州集屏山先生李純甫字之純宏州人承安二年進士仕至尚書右司都事為舉子曰亦自不碌碌于書無所不闕而于莊周則禦寇左氏戰國策為尤長文亦畧能似之三十歲後徧觀佛書能悉其精微既而取道學書讀之著一書合三家為一就伊川橫渠晦庵諸人所得者而商略之毫髮不相貸且恨不同時與相詰難也性嗜酒未嘗一日不飲亦未嘗一飲不醉眼花耳熱後人有發其政端者隨問隨答初不置慮漫者知所以純室者知所以通傾河瀉江無有窮竭好賢樂善雖新進少年游其門亦與之為爾汝交其不自貴重又如此迄今論天下士至之純與雷希顏則以中州豪傑數之子全字稚川今居鎮陽○歸潛志李翰林純甫字之純宏州襄陰人祖安上舊魁西京進士父采仲文卒于益都府治中公幼穎悟異常兒初為詞賦學後讀左氏春秋大愛之遂更為經義學踰冠擢高第名聲煒然為文法莊周左氏故其辭雄奇簡古後進宗之文風由此一變又喜談兵慨然有輕世志泰和南征兩上書策其勝負章宗咨異給逆軍中後多如所料率執奇其文薦入翰林及北方兵起又上疏論事不報宣宗南渡再入翰林時丞相尤虎高拱擅權擢為右司都事公審其必敗以母老辭去俄而高與誅死議者智之再入翰林連知貢舉正大末由取人踰新格出倅坊州未赴改京兆府判官卒于南京年四十七公為人聰敏於學無所不通少自負其材謂功名可俯拾作矮柏賦以諸葛孔明王景畧自期由小官上萬言書援宋為證甚切當路者以迂闊見抑士論惜之中年度其道不行益縱酒自放無仕進意得官未嘗成考旋即歸隱居間與禪僧士子游惟以文酒為事嬉歌烈揚出禮法外或飲數月不醒人有酒見招不擇貴賤必往往

輒醉雖沈醉未嘗不著書至于談笑怒罵燦然皆成文理天資喜士後進
有一善極口稱道一時名士皆由公顯于世又與之拍肩尔汝忘年齒相
歡教育拊摩患若親戚故士大夫歸附號為當世龍門嘗自作屏山居士
傳末曰雅喜推借後進如周嗣明張穀李經王權雷淵子先子姓名宋九
嘉皆以兄呼而居士使酒玩世人忤其意輒嫚罵之皆其志趣也其自贊
曰軀幹短小而朴視九州形容癯陋而蟻蝨公侯語言蹇吃而連環可解
筆札訛廢而挽回萬牛寧為時所棄不為時所囚是何人也耶吾所學者
淨名莊周晚自類其文凡論性理及關佛道二家者號內蘊其餘應物文
字如碑誌詩賦號外蘊蓋擬莊子內外篇又解楞嚴金剛經老子莊子又
中庸集解鳴道集詮號中國心學西方文教數十萬言嘗曰自莊周後惟
王績元結鄭厚與吾同其所學也每酒酣歷歷論天下事或設儒釋異同
雖環而攻之莫能屈世豈復有此俊傑人哉○又史學優吳屏山詩張侯
新作九原人梁子今為戰血塵四
海交游零落盡白頭扶杖哭之純

世法拘人蝨處禪忽驚龍跳九天門牧之宏放見文筆白也
風流餘酒尊落落久知難合在堂堂元有不亡存中州豪傑
今誰望擬喚巫陽起醉魂

牧之

唐書本傳牧自資材略喜論兵事疑欲
致位公輔以時無右援者怏怏而終

難合

後漢耿弇傳帝謂曰將軍前在
南陽建此大業常以為落落難

合有志者
事竟成也

談塵風流二十年空門名理孔門禪諸儒久已同堅白博士
真堪補太元孫况小疵良未害莊周陰助恐當然遺編自有
名山在第一諸孤莫浪傳

談塵

蘇軾詩談辯如雲玉塵揮

孔門禪

歸潛志與定再入翰林時趙閑閑爲翰林長于先子爲御史李欽止欽叔劉光甫俱在朝每相見輒談儒佛

異同相與折難久之屏山以禪語解云中庸那著無多事只怕諸儒誤識神光子和之亦嘗云後云談元正自伯陽孫倭佛真成次律身畢竟諸儒拔不去可憐饒舌費精神蓋屏山常言我祖老子豈敢不學老莊我前生一僧豈敢不學佛故先子及之屏山覽之大笑且曰拔字如何下來先子曰公羊諸大夫拔隱而立之是也○湛然集楞嚴外解序云子故入屏山居士常引易論語孟子老氏莊周之書與此經相合者輯成一編謂之外解又書金剛別解後云昔樂天答制策稍涉佛老之議中年鄮海山而修兜率垂老爲讀佛髮願文乃云起因張太其事見于本集子瞻上萬言書頗稱釋氏之弊晚節專溺墨爲佛事臨終作神呪浪出之偈且曰著力卽差其事見于年譜退之屈論于大顛而稍信佛書韓文公別傳在焉永叔服膺子圓通而目稱居士歐陽公別傳在焉屏山先生幼年作排佛說始不忍聞未幾幡然而改火其書作一解以條前非所謂改過不吝者子于屏山有取焉又鳴道集序云屏山居士年二十有九閱復性書知李習之亦二十有九參藥山而著書大發感歎日抵萬松老師深攻急擊宿稟生知一聞千悟注首楞嚴金剛般若釋迦文達摩祖師夢語贊談翰墨佛事等數十萬言會三聖人性理之學要終指歸佛祖而已○王稹忠文集鳴道集說序屏山先生李公其庶幾古之立言者乎先生諱之純字純甫宏州人金章宗承安間進士仕至尚書右司都事資藏英邁天下書無不讀其于莊周列御寇左氏戰國策爲尤長文亦略能似之三十

歲後編觀佛書既而取道學諸家之書讀之一旦有會于心乃合三家為一取先儒之
箋說其義相合者著為成書所謂鳴道集說觀其為說前無古人誠卓然有所自見學
術不苟同于眾人而惟道是合也還山元公常以中州豪傑稱之謂其庶幾
古之立言之君子豈不信乎○案屏山所作面壁庵記見鮑刻歸潛志中
荀卿傳趙亦有公孫龍為堅白同異之辨注太康地記汝南西平縣有龍淵可用淬刀
劍特堅利故有堅白之輪云黃所以為堅白所以為利也或辯之曰白所以為不堅黃
所以為不利平原君傳公孫龍善為
堅白之辨及郊衍言至道乃繼之
太元漢揚雄傳時雄方草太元或囑雄
韓愈讀荀子云荀蘇軾莊子祠堂記莊子之言皆實子而文
與揚大醇而小疵陰助
不子陽擠而陰助之其正言蓋無幾云
浪傳朝野僉載
口莫浪傳
阿婆顧

內鄉縣齋書事

地志南京路鄧州內鄉縣○
新樂府有內鄉作滿江紅詞

吏散公庭夜已分寸心牢落百憂薰催科無政堪書考出粟

何人與佐軍飢鼠遶牀如欲語驚鳥啼月不堪聞扁舟未得

滄浪去慚愧春陵老使君

遠祖次山春陵行云思欲委符節引等
自刺船故子美有與舍滄浪清之句

催科

唐書陽城傳撫字心勞
催科政拙注下下考

春陵

案刺船二句乃賤退示
官吏詩非春陵行句

自菊潭丹水還寄松前故人

臘雪春泥晚未乾馬迎殘照入荒寒初無鳬鳥將安往正有
牛刀恐亦難倦客不知歸路遠孤城唯覺暮山攢黃金鍊出
相思句寄與同聲別後看

鳬鳥

後漢王喬傳爲葉令每月朔來朝有雙鳬從
東南來舉網張之得雙鳥乃所賜尚書履

被檄夜赴鄧州幕府

幕府文書鳥羽輕敝裘羸馬月三更未能免俗私自笑豈不
懷歸官有程十里陂塘春鴨鬧一川桑柘晚烟平此生只合
田間老誰遣春官識姓名

馬鄧驛中大雨

萬壑千巖一雨齊先聲噴薄捲湍溪投林鳥雀不暇顧移穴
蛟龍應自迷便恐他山藏厚夜豈知高樹有晴霓兩江合向
西南鬪坐想風雲入鼓鼙

馬鄧西南兩浙
水相合處也

除夜

一燈明暗夜如何寐夢衡門在澗阿物外烟霞玉華遠花時
車馬洛陽多折腰真有陶潛興扣角空傳甯戚歌三十七年
今日過可憐出處兩蹉跎

扣角

新序甯戚實車適齊暮宿郭門外桓公郊迎客戚
飮牛車下扣牛角疾商歌公聞之曰此非常人也

鄧州相公命賦喜雨

輕陰十日暮春前和氣朝來雨沛然河潤定應連上國雲來
端合自中天帥從洛陽移鎮烽零帶溼閑幽障麥壠分清入廢田共識
使君霖雨手調元消息在今年

幽障

後漢祭彤傳論臥鼓
于邊庭滅烽于幽障

移鎮

案本集二十卷夾谷碑云中京陷守移刺瑗雅
敬公碑載正大四年則移鎮當在四年內也

劉光甫內鄉新居

本集三十六卷東坡詩雅引云
書于光甫內鄉之東齋即此

豸冠平日凜秋霜老去聲名只閉藏父老漸來同保社兒童

久已愛文章蔬隨隙地皆成圃竹放新梢欲過墻爲向長安
舊游道世間元有北窗涼

豸冠

後漢典服志法冠或謂獬豸冠神羊能別曲直故以爲冠

西齋夜宴

時爲內鄉令

飄零無物慰天涯酒伴相逢飲倍加悞謬君當略彭澤迴旋
我亦笑長沙金釵翠鞵迎春髻銀燭光搖半夜花只欠東山

游錄事不來堅坐看紛譁

叔能信之張杜諸人皆在而麟之獨不至

誤謬

陶潛詩但恐多謬誤君當恕醉人

迴旋

史記長沙定王世家景帝後二年諸王來朝詔諸王歌舞定王但張袖小舉手上惟問之答曰臣國小地狹不足

迴旋

案揚叔能麻信之外張即仲經杜即仲梁麟之當即游錄事歸潛志許古傳末云游叔麟之爲鳳翔錄事先人又寄以詩云云續更

堅志德升後身游麟之言云云竝是惜他無所見

十月

十月常年見蚤梅今年二月未全開春寒春暖花如故年去

年來老漸催大藥誰傳軒后鼎習僊虛築漢官臺憑君撥置
人間事不負浮生只此杯

大藥

枕中方凡服金丹大藥雖
未去世之日邪不敢近

送吳子英之官東橋且爲解嘲

中州集周馳傳遼東人吳子英
嘗從仲才學○新樂府定風波

序見後十卷李德之
詩箋又十一卷圖詩

柴車歷鹿送君東萬古書生蹭蹬中良醞暫畱王績醉新詩
無補玉川窮駒陰去我如決驟蟻垤與誰爭長雄快築糟丘
便歸老世間馬耳過春風

長雄

後漢鮑宣傳徙上黨以地少
豪俊易長雄乃家于長子

張主簿草堂賦大雨

浙樹蛙鳴告雨期忽驚銀箭四山飛長江大浪欲橫潰厚地
高天如合圍萬里風雲開偉觀百年毛髮凜餘威長虹一出

林光動寂歷邨墟空落暉

橫去聲

丹霞下院同仲澤鼎玉賦

時從商帥軍至南陽。新樂府有載玉同手鼎玉一絡索詞。史武慎傳慎深

數學正大初待詔東華門其友王鉉問曰朝廷若問國祚修短子何以對

有奇驗正大七年夏與燕人王鉉邂逅于葉縣村落中初不相識坐中膠

以兵官對胡曰此公在吾法中當登科甲何以謂之兵官衆愕然遂以實

告策二傳王鉉當即鼎玉○河汾詩房希白有慶王鼎玉生子詩○中州

集王仲澤游丹霞下院同裕之鼎玉分韻得留字詩霜落豐山白水收翠

華全在竹面頭賦詩鞍馬漸真賞戴酒林泉阻勝游野色自隨人意遠

陽應爲鳥聲聞仙源回首旌旗隔一笛西風喚客愁○史完顏料烈傳名

鼎字國器年二十以善戰知名自善泗元帥轉安平都尉鎮商州威望甚

重陳和尚傳兄斜烈時太原王渥爲經歷官本集二十七卷鎮南碑同○

本卷中秋雨夕注商帥國器蓮中作九卷即事注商帥國器見免從軍十
二卷雪香亭其六詩注十年前商帥國器方城夢中得後二句爲言如此
竝是○又王辰雅編載保全歐陽文忠子姓一條見大德銘箋○中州樂
府王渥從商帥國器獵同裕之賦水龍吟詞短衣匹馬清秋憤會射虎南
山下西風白水石鯨鱗甲山川圖畫千古神州一時勝事賓僚儒雅漫長
堤萬弩平岡千騎波濤捲魚龍夜落日孤城鼓角笑歸來長圍初罷風雲
慘淡鐘鼎得意旌旗閑暇萬里天河更須一洗中原兵馬看健葉鳴咽咸
陽道左拜西還駕新樂府先生和詞少年射虎名豪等閑赤羽千夫騰金
鈴錦袖平原千騎星流電轉路斷飛潛霧隨騰沸長圍高掩看川空谷靜
旌旗動色得意似平生戴城月迢迢鼓角夜如何軍中高寒江淮草木中

原孤兔先聲自遠蓋世韓彭可能只辯尋常鷹犬問元戎豈
晚鳴鞭竟去解天山前集二詞當為從軍南陽時作故錄之

鞍馬匆匆去復還霜鐘今得見豐山千年香火丹霞老滿眼
興亡白水閑壯志自憐消客路深居誰得似禪關只應頻有
西來夢夜夜青林杳靄間

丹霞老

續夷堅志丹霞長老號方字志道前身為
柳小二詞法鑄和尚住丹霞親為子言

春日半山亭游眺

日照春山花滿煙獨攜尊酒此江邊江流衮衮望不極世事
悠悠私自憐小草不妨懷遠志芳蘭誰為發幽妍千年石壁
留詩在會有騷人一慨然

小草

世說藥中有遠志桓公取以問謝公曰此藥又名小草
何一物而二稱郝隆曰此易解處為遠志出為小草

別程女

芸齋淅淅掩霜寒別酒青燈語夜闌生女便知聊寄託中年

尤覺感悲歡松間小草栽培穩掌上明珠棄擲難明日緱山
東畔路野夫懷抱若爲寬

出山

松門石路靜無關布韞青鞋幾往還少日漫思爲世用中年
直欲伴僧閑塵埃長路仍回首升斗微官亦強顏休道西山
不畱客數峯如畫暮雲間

布韞

杜甫詩青鞋
布韞從此始

謝鄧州帥免從事之辟

案先生大德本墓銘云初除鎮平台再
轉內鄉遂丁艱憂終喪辟中州南陽令

憂端擾擾力難任世事駸駸日見臨三載素冠容有媿一時
墨經果何心首丘自擬終殘喘陟屺誰當辨苦音遙望朱門
涕橫落相公恩德九泉深

墨經

晉襄公事
見左傳

新野先主廟

次鄧帥韵。○地志鄧州穰城縣新野鎮。○案此詩與十卷

刺瑗頗尚風雅而其元唱中
州集不載他書遂無一字

一軍南北幾扶傷長坂安行氣已王豪傑盡思爲漢用江山
初不假吳強兩朝元老心雖壯再世中興事可常寂寞永安
宮畔土爭教安樂似山陽

長坂

蜀志張飛傳先主奔江南曹
操追之及于當陽之長坂

永安

華陽國志先主戰敗步
道還魚復改爲永安

石門

案嘉靖河南志南陽
府石門山下引此詩

兩崖懸絕倚山垠草徑低迷劣可分潭影乍從明處見竹香
偏向靜中聞石林萬古不知暑茅屋四鄰唯有雲曳杖行歌
羨樵叟此生何計得隨君

獨峰楊氏幽居

邨墟瀟灑帶新晴落日千山一片青世外衣冠存太朴雲間

雞犬亦長生清江兩岸多古木平地數峰如畫屏惆悵朝陽
一茅屋酒船茶竈負生平

渡湍水

悠悠人事眼中新悄悄孤懷百慮紛伎倆本宜閑處著姓名
誰遣世間聞秋江澹沲如素練沙浦空明行暮雲蚤晚扁舟
載煙雨移家來就野鷗羣

十日登豐山

十日登高發興新豐山孤秀出塵氛邨墟帶晚鴉噪合林壑
得霜煙景分芳臭百年隨變滅短長千古只紛紜詩成一嘆
無人會白水悠悠入暮雲

岐陽三首

地志鳳翔路鳳翔府按地本漢右扶風魏爲扶風郡後魏爲岐州隋于州城內置岐陽宮岐陽縣在岐州東百里居岐山之陽

少陵詩有西憶岐陽信之語故云○史哀紀正大四年五月元兵平臨洮府七月自鳳翔徇京兆關中大震六年十月元兵駐慶陽界詔陝西行省

遣使乞和八年正月元兵圍鳳翔府四月元兵平鳳翔府兩行省棄京兆
○完顏合達傳正大七年十月詔蒲阿同合達行省事于關鄉以備潼關
先是議者謂止可助陝西軍以決一戰使陝西不守河南亦不可保至是
自陝以西亦不守矣八年正月北師速不剌攻破小關殘盧氏朱陽散漫
百餘里間潼關總帥納合買住求救于二省二省以陳和尚忠奉軍一千
都尉夾谷渾軍一萬往應北軍退追至谷口而還兩省輒稱大捷以聞既
而北軍攻鳳翔二省提兵出關二十里與渭北軍交至晚復收兵入關鳳
翔遂破二省遂棄京兆○元史太宗紀二年庚寅七月帝自將南伐皇弟
拖雷皇姪蒙哥率師渡河攻
鳳翔三年辛卯二月克鳳翔

突騎連營鳥不飛北風浩浩發陰機三秦形勝無今古千里
傳聞果是非偃蹇鯨鯢人海涸分明蛇犬鐵山圍窮途老阮
無奇策空望岐陽淚滿衣

突騎

後漢景丹傳爲偏將從
攻王郎絕突騎大破之

人海

司空圖詩鯨鯢人
海涸魑魅棘林幽

鐵山

長阿舍經海外有山
卽是大鐵圍山四月

圍輪并一日月晝夜迴
轉照四天下者一國土

百二關河草不橫十年戎馬暗秦京岐陽西望無來信隴水
東流聞哭聲野蔓有情縈戰骨殘陽何意照空城從誰細向

蒼蒼問爭遣蚩尤作五兵

百二史高祖紀秦形勝之國帶山河之險十年少陵哭聲中州集雷增詩序

秦民之東徙者餘數十萬口攜持負戴絡繹山谷間晝餐無縷帛夕休無室居飢羸暴

露填死無幾間有為秦聲寫去國之情者其始則嘹亮而宛轉若有有所訴焉少則幽抑

而淒厲若訴而怒焉及其放也嗚嗚焉惜情焉極其情之所之又若弗能任焉者噫秦

子父母國也而客言如是聞之悲不可禁乃為作商歌十章倚其聲以紓予懷詩略云

盡室東行且求歸歸行猶自鎖門扉為語妻梁雙燕子春來秋去傍誰飛

鬢髮老稚自相攜側耳西風聽馬嘶百死才能到關下仰看猶似上天梯

耽耽九虎護秦關儒楚屏齊机上看禹貢土田推陸海漢家

封微盡天山北風獵獵悲笳發渭水瀟瀟戰骨寒三十六峰

長劒在倚天仙掌情空閑

九虎宣紀魏定二年九月戊子机上魏志吳質傳質按劒口曹子丹汝非屠陸

海漢東方朔傳所隴以東商封微漢書季武世出師建塞天山漢武紀天漢二

圍城病中文舉相過

元集卷八

十六

擾擾長衢日往回病中聊得避喧埃愁多頓覺無詩思計拙
惟思近酒杯潘岳鏡中渾白髮江淹門外卽蒼苔生涯若被
旁人問但說經年鼠不來

讀靖康僉言

書錄解題朝野僉言二卷不著名氏有序建
安元年八月繫年錄云夏少曾未詳何人

浚郊沙浩浩茫茫河廣纔堪一葦航顛沛且當懲景德規模
何必罪朱梁滄溟不掩蛟龍窟大地同歸雀鼠鄉三百年間
幾降虜長星無用出光芒

沙海

一統志沙海在汴城西北十二里孟
浩然詩風吹沙海雪來作柳園春

景德

宋真宗中辰元
年指澶淵事

雨後丹鳳門登眺

地志南京北門曰丹鳳○五行志元光二年七月丹
鳳門壞歷數人哀宗正大四年八月丹鳳門扉壞

絳闕遙天霽景開金明高樹晚風迴長虹下飲海欲竭老雁
叫羣秋更哀劫火有時歸變滅神嵩何計得飛來窮途自覺
無多淚莫傍殘陽望吹臺

金明

宋史禮志淳化三年三月帝幸金明池命為競渡之戲

虹飲

筆談虹常下湖飲兩頭皆垂澗中

神嵩

唐禮志則天改崧山為神岳太

師天中上

京居辛卯八月六日作

四壁秋蟲夜語低南窗孤客枕頻移野情自與軒裳隔旅食難堪日月遲平子歸田元有約魏舒襜被恐無期一莖白髮愁多少慚愧家人賦戾戾

歸田

文選歸田賦者張衡致仕不得志欲歸田而作

襜被

晉魏舒傳時沙汰郎官非其才者罷之曰我即其人也襜被而出

戾戾

風俗通百

里奚仕秦其妻歌曰百里奚五羊皮憶別時烹伏雌炊粳飯今富貴忘我為

浩然師出圍城賦鶴詩為送

本集十四卷耶律浩然山水跋詩案浩然此出豈亦中書君理索者耶

夢寐西山飲鶴泉羨君歸興渺翩翩昂藏自有林壑態飲啄暫隨塵土緣遼海故家人幾在華亭清唳世空憐明年也作江鷗去水宿雲飛共一天

飲鶴泉

在崧山見上

華亭

晉陸機傳成都王穎收機嘆曰華亭鶴唳可得聞乎

追用坐主閑閑公韻上致政馮內翰二首

淦水集慶學士叔獻七十壽詩

云乞得閑身七十餘知幾初不為鱸魚胸中幸有平遠策林下聊觀養性書收拾雲山歸蠟屐卷藏事業入藍輿君臣撫御思頗敘未許先生作隱居又云小築龍潭德不孤盧鴻新有草堂圖四朝人物今誰在二老風流與我俱把酒笑談猶解醉上山筋力不須扶文章不逐年齡改能為閑興作頌無家趙詩作于天興元年春時馮已七十一歲○內翰詳一卷詩注

峻坂平生幾疾驅歸休甫及引年初東門太傅多祖道北闕詩人休上書阜樞老歸千里驥白雲閑釣五溪魚非熊有兆公無恙會近君王六尺輿

北闕

孟浩然詩北闕休上書南山歸微廬

白雲

陳陶句

熊兆

案此詩先生當作于園城中為馮內翰歸崧山時所上亦猶寄耶律書之意故

有此語

六尺輿

漢袁盎傳天子所與共六尺輿者皆天下豪賢

草堂人物列僊臞萬壑松風酒一壺少日打門無俗客老年爭席有樵夫巨源不入竹林選元亮偶成蓮社圖野史他年

傳耆舊風流一一似公無

列仙

史記司馬相如傳列仙之儒居山澤間形容甚癯

懷秋林別業

史武仙傳天興二年八月自內鄉入聖桑寨至峽石左右八疊秋林聞總領楊全已降宋留秋林十日乃遷太和即

此○本集十一卷秋林道中寄家詩又暫歸秋林詩新樂府內鄉北山臨江仙云夏館秋林山水窟竝是

茅屋蕭蕭淅水濱豈知身屬洛陽塵一家風雪何年盡二頃

田園入夢頻高樹有巢鳩笑拙空墻無穴鼠嫌貧西南遙望

腸堪斷自古虛名只誤人

壬辰十二月車駕東狩後卽事五首

歸潛志錄大梁事天興元年十二月朝議以食

盡無策末帝親出東征丞相襄不平章白撒右丞完顏幹出工部尚書權參政李蹊樞密判官白華近侍局副使李大節左右司郎中完顏進德張表總帥徒單百家蒲察官奴高顯劉奕皆從上與太后皇后諸妃別大慟誓以不被敵不歸儀衛肅然見者悲愴留參政完顏奴申樞副完顏留你阿不權行尚書省兼樞密事以餘兵守南京上既出遇鞏州帥完顏胡糾虎提兵轉戰來赴援因從以東末帝既出人情愈不安日夜望東征之捷俄聞北渡前鋒方交戰有功取蒲城進取衛州白撒等望見北兵遽勸上登舟南渡從官多攀從不及死于兵而曉將徒單百家高顯劉奕輩初不

知上去已而軍士皆散沒上以餘兵狼狽入歸德杜門京民大恐以爲將
不救矣二守臣素庸闇無謀但知閉門自守百姓食盡無以自生米升直
銀二兩貧民往往食人殍死者相望官日載數車出城一夕皆鬪食其肉
淨盡縉紳士女多行乞于街民間有食其子錦衣寶器不能易米數升人
朝出不敢夕歸懼爲飢者殺而食平日親族交舊以一飯相避于家又日
殺馬牛乘騎自啗至于箱篋鞍轡諸皮物凡可食者皆煮而食之其貴家
第宅與夫市中樓館木材皆徹以爨城中觸目皆瓦礫廢區無復向來繁
侈矣朝官士庶往往相結攜妻子突出北歸衆謂不久當大潰○哀紀天
興元年十二月庚子上發南京與太后皇后諸妃別大慟行次公上苑太
后遣中官持米肉餽犒軍士辛丑至開陽門外應百官退詔諭戍兵曰社
稷宗廟在此汝等壯士也毋以不顧進發之數便謂無功若保守無虞稍
來功賞願豈在戰士下聞者皆洒泣是日韋昌元帥完顏忽斜虎至自金
昌請西幸使白撒爲上言三百里之間無井竈不可往東行之議遂決以
爲尚書右丞從行遂次陳留壬寅次杞縣癸卯次黃城甲辰次黃陵岡乙
巳諸將請幸河朔從之二年正月丙午朔濟河北風大作後軍不克濟丁
未大元追擊于南岸元帥完顏猪兒贊都喜死之建威都尉完顏元論出
降已酉上哭祭戰士于河北岸皆賔官斬元論出二弟以殉赦河朔招集
兵糧議取衛州元帥蒲察官奴將忠孝軍千人東面元帥高顯果殺都尉
粘哥咬住領軍萬人爲前鋒至滿城庚戌上次滏縣岡平章政事白撒元
帥和速嘉兀底不繼至辛亥白撒引兵攻衛州不克乙卯聞大元兵自河
南渡河至衛之西南遂退師丁巳戰于白公廟白撒敗績棄軍東遁元帥
劉益上黨公張開亦遁竝爲民家所殺益部曲王全降戊午上進次滿城
復還魏樓村已未上以白撒謀殺棄六軍渡河與副元帥合里合六七人
走歸德庚申諸軍始知上已往遂潰辛酉司農大卿蒲察世達元帥完顏

出歸德西門奉迎上入
歸德○又見白撒等傳

翠被忽忽見執鞭戴盆鬱鬱夢瞻天只知河朔歸銅馬又說
臺城墮紙鳶血肉正應皇極數衣冠不及廣明年何時真得
攜家去萬里秋風一釣船

翠被

左傳楚子皮冠翠被豹舄以由

戴盆

報任少卿書僕以望天

銅馬

後漢光武事○丙族白撒傳天興元年十二月甲辰車駕

至黃陵岡白撒先降大名兩寨得河朔降將上赦之授以印及金虎符群臣議以河朔諸將前導鼓行入開州取大名東平豪傑當有應者破竹之勢成矣溫敦曰孫曰太后中宮皆在南京北行萬一不如慈聖主孤身欲何所為若往歸德更五六月不能還京不如先取衛州還京為便白撒奏曰聖體不便鞍馬且不可令大兵知上所在今可駐歸德臣等率降將往東平俟諸軍到可一鼓而紙鳶獨與志梁太清三年侯景圍臺下因而經略河朔且空河南之軍上以為然城簡文綽紙鳶飛空告急于外景令善射者射之及墮化為禽鳥飛入雲中○白撒傳時上已遣官奴將三百騎探邏麻岡未還上將御船賜白撒劍得便宜從事決東平之策官奴還奏麻岡有棋可取上召白撒問之曰京師且不能守就衛州欲何為耶東平之策為便上主官奴之議明年正月朔次黃陵岡歸德守臣以糧糗三百餘船來餉遂就其舟北濟命白撒攻衛州上駐兵河上以親衛軍護從白撒兵至衛以御旗黃撒招之不下自發蒲城遷延八日始至衛而猝無攻具縛槍為雲梯州人知不能攻守益益嚴凡攻三日不克及聞河南大兵濟自張家渡至衛西南遂班師大兵踵其後戰于白公廟敗績白撒棄兵遁車駕還次蒲城東點檢元典等請上登舟上曰正當決戰何遽退乎少頃白撒至倉皇言于上

日今軍已潰大兵近在堤外請聖主幸歸德上遂登舟
待衛皆不知巡警如故時夜已四更矣遂狼狽入歸德
都留守劉允章率百官迎謁十二月壬午旦賊夾攻潼關關上兵皆潰甲甲田令孜聞
巢已入關帥神策兵五百奉帝自金光門出百官皆莫之知巢前鋒將入長安金吾大
將軍張直方帥文武
數十人迎巢于鄠上

慘澹龍蛇日鬪爭干戈直欲盡生靈高原水出山河改戰地
風來草木腥精衛有冤填瀚海包胥無淚哭秦庭并州豪傑
知誰在莫擬分軍下井陘

精衛

事見山海經○宣紀貞祐二年三月奉衛紹公主歸于大元太祖皇帝是為公
主皇后徒單鎰建議和親趙秉文從軍行漢家公主嫁烏孫聖主重戰議和親

包胥

事見史記本傳○世宗諸子瑋傳天興初瑋王出質見哀宗于降德殿聞
訛可欲出議和訛可年幼不苦諄諫恐不能辦大事臣請副之或代其行

州

案此指河
朔九公事

鬱鬱圍城度兩年愁腸飢火日相煎焦頭無客知移突曳足
何人與其船白骨又多兵死鬼青山元有地行倦西南三月
音書絕落日孤雲望眼穿

焦頭

事見國策○史自華傳正大八年大軍攻鳳翔合達滿阿兩行省晏然不動因遣華諭以上意且觀二相見北兵勢大皆有懼心私問樊澤定住陳和尚以爲

何如皆曰大兵豈可輕料者是眞不敢動華奏之上曰我故知其怯不敢動矣復遣諭二相云鳳翔圍久恐不能支行省當領軍出關與渭北軍交手稍紓鳳翔之急二相聞奏傾旨華東避及中牟已有兩省納奏人追及因取密院副本讀之言領旨提軍出關二十里至華陰界與渭北軍交是晚收軍入關華印天浩歎曰事至于此無如之何矣

不二三日鳳翔陷兩行省遂棄京兆與牙

曳足

後漢馬援傳進攻豈頭賊乘高守隘船不得上會暑甚士卒多疫死援亦

吾塔起遷居民于河南留殿山奴守之病困乃穿岸爲室以避炎氣賊每升險鼓譟援輒曳足以觀之左右哀其壯意莫不流涕○白華傳上還華傳諭二相二相不悅蒲阿遣水軍虹縣所屯王提控以小船二十四隻令華順河而下必到八里莊門爲期且曰此中望八里莊如在雲間天上省院端坐徒事口吻今樞判親來可以相視可否歸而奏之華力辭不獲遂登舟及淮與河合流處才及八里莊城門相直城守者以白鷁大船五十汴流而上占其上流以截歸路華幾不得還昏黑得徑先歸乃啓兩省怒朝省不益軍皆華輩主之故擠之險地耳

地行仙

語見楞嚴經○白華傳上在歸德時提點近侍粘古之兄瑗爲鄧州節度其子與粘古之子竝從駕爲衛士適朝廷將召鄧兵入援粘古因與華謀

同之鄧且拉其二子以往上覺之獨命華行而粘古改之徐州案樞判出歸德之圍城就南陽之樂土道路傳聞如此而音問絕無故先生有地行仙之句此詩定爲指樞判作

萬里荆襄入戰塵汴州門外卽荆榛蛟龍豈是池中物蟻蝨

空悲地上臣喬木他年懷故國野烟何處望行人秋風不用

吹華髮滄海橫流要此身

荆襄

李俊民莊靖集和王季文襄陽變後詩云運處中原未識真指蹤元自有謀臣

虞全不念昏亡國楚恐難當舌在人拔劍挽回牛斗氣舉鞭起漢江塵相逢

空洒英雄淚誰是荆州一角麟天命須分偽與真衝鋒戰蟻盡君臣蛟龍不是池中物

燕雀休嗤龍上人衣不能勝縹緲血屬無可奈更公應自從絕筆春秋後誰復傷時為

泣蛟龍吳志周瑜傳奏曰劉備梟雄必非久屈蟻蝨盧全月蝕詩云地上蟻

木顏延之詩故國多野烟唐昭宗在興元有菩薩蠻詞云回頭遙望紫宮殿茫茫只

喬木空城凝寒雲野烟見雙飛燕潯水一條流千山與萬丘野烟生碧樹陌上行

人去何處有英雄橫流晉書王尼傳尼早喪婦有一子無居宅惟畜露車有牛一頭

雄迎儂歸故宮橫流每行輒使御之暮則共宿車上常嘆曰滄海橫流處不安也

五雲宮闕露盤秋銀漢無聲桂樹稠複道漸看連上苑戈船

仍擬下揚州曲中青冢傳新怨夢裏華胥失舊遊去去江南

庾開府鳳凰樓畔莫迴頭

庾信哀江南賦倚弓于玉女憲屏繫馬于鳳凰樓柱

永寧南原秋望

地志南京路滿州永寧縣○宣紀元光二年十月辛卯詔石壕店澠池永寧各屯兵千人徒單元典傳天興元

年行省遣趙提控者權元帥守永寧元村寨十一月冬至大兵已攻破元

村寨○本集三十五卷竹林禪院記云南原當大川之陰壤地沃衍分流

交貫嘉木高蔭長穀美稷號為河南草杜

即此○新樂府有永寧時作朝中措詞

浩浩西風入敝衣
茫茫野色動清悲
洗開塵漲雨纔定
老盡物華秋不知
烽火苦教鄉信斷
砧聲偏與客心期
百年人事登臨地
落日飛鴻一線遲

中秋雨夕

商帥國器筵中作○
案商帥見上丹霞注

南樓高興在胡牀
十日秋陰負一觴
庾老未應妨嘯詠
素娥多自怨昏黃
此生此夜不長好
行雨行雲有底忙
卻恐哦詩太愁絕
且燒銀燭看紅妝

此生

東坡句

有底忙

韓愈詩有底忙時不肯來

癸巳四月二十九日出京

歸潛志錄大梁事四月二十日使者發三教醫匠人等出城俄復遣入于時同

諸生復入居八仙館中五月二十二日會使者召三教人從以北案先生出京乃二十九日始以亡金故官將拘管聊城故不同日也

塞外初捐宴賜金
當時南牧已駸駸
只知灞上眞兒戲
誰謂神州遂陸沈
華表鶴來應有語
銅槃人去亦何心
興亡誰識

天公意留著青城閣古今

國初取宋于青城受降

冥賜

史移刺子故傳正陸中詔子故冥賜諸部。徙單克寧傳大定二十五年左丞相守道賜宴北部。完顏守貞傳監察御史蒲刺都劾奏守貞前宴賜北部有

取受事不報。李愈傳字景韓之正平人明昌二年授曹王傅王奉命宴賜北部愈從行還過京師表言諸部所貢之馬可委招討司受于界上量給回賜務省費以廣邊儲擬自臨潢至西夏臨邊創設重鎮數十仍選猛安謀克勳臣子孫有材力者使居其職田給予軍者許募漢人佃種不必遠輓牛頭聚而兵自富強矣上覽奏納用焉自是五年一宴賜人以爲便。崇浩傳章宗即位明年宴賜東北部。中州集董師中傳有宴賜邊部詩傳于世。李純甫贈高仲常詩云斗絕牛皮嶺荒寒燕賜城。澄水集撫州詩云燕賜城邊春草生。野孤嶺上少人行。南牧。史章紀明昌五年二月癸丑命宣徽使移賴敏戶部侍生野孤嶺上少人行。南牧。耶亦蓋實理哥相視北邊營屯經畫長久之計九月戊寅勅尚書省集百官議備邊事案史載。青城。歸潛志大梁城東五里號青城乃金國北兵不見主名大抵指廣吉刺部爲是。青城。初粘罕駐兵受宋二帝降處當時后妃皇族皆詣焉因盡俘而北後天興末末帝東遷崔立以城降北兵亦于青城下寨而后妃內族復詣此地多慘死亦可性也又錄大梁事崔立聚皇族皆入宮俄遣詣青城皆爲北兵所殺如荆王梁王輩皆與焉獨太后皇后諸妃嬪宮人北徙。夷紀天興二年四月癸巳崔立以梁王從恪荆王守純及諸宗室男女五百餘人至青城皆及于難甲午兩宮北遷。崔立傳四月壬辰立以兩宮梁王荆王及諸宗室皆赴青城甲午北行立妻王氏備仗衛送兩宮至開陽門是日宮車三十七兩太后先中宮次之妃嬪又次之宗族男女凡五百餘口皆赴北。宋史欽紀靖康元年十一月辛酉帝令孫觀携降表如青城二年正月庚子帝復如金師金人隔帝青城四月庚申金人分道以二帝及后妃太子宗戚凡三千人由汴北去。癸辛別業北客詠汴京青城詩萬里風霜空綠樹百年興廢又青城蓋金之亡亦聚諸王于青城而殺之。陵川集青城行云嶺山壓

城殺氣黑一夜京城忽流血弓刀合沓滿掖廷妃主喧呼總狼籍驅出宮門不敢哭血
淚滿面無人色戴樓門外是青城制郅赴死誰敢停百年涵育盡塗地死霧不散皆青
冥英府親賢端可憐白首隨例亦就刑最苦愛王家兩族二十餘年不會出朝朝點數
到堂前每向官司求米肉男男女女妹自夫婦親面相看冤更酷一旦開門見天日推入
行間便誅戮當時築城爲郊祀卻與王家作東市天與初年靖康末國破家亡酷相似
君取他人既如此今朝亦是尋常事君不見二百萬家族盡赤八十里城皆瓦礫白骨
更比青城多遺民獨向王孫泣禍本骨肉相殘賊大臣蔽君尤壅塞至今行
人不歎承天門行人但嗟蒙利宅城荒國滅猶有十仞牆牆頭密匝生鐵棘

喜李彥深過聊城

新樂府有懷李彥深浣溪詞李濟南人○地志
山東西路博州聊城縣○本集三十五卷清真觀

記自大梁拘管聊城三十七卷南
冠錄引歲甲午拘管聊城並是

圍城十月鬼爲鄰異縣相逢白髮新恨我不如南去雁羨君
獨是北歸人言詩匡鼎功名薄去國虞翻骨相屯老眼天公
只如此窮途無用說悲辛

匡鼎

漢匡衡傳母說詩匡鼎來○
杜甫詩匡衡抗疏功名薄

虞翻

別傳翻放去南方自恨疎節骨體不媚犯
上獲罪當長沒海隅生無可與語死以青

蠅爲甲客使天下一人知己者足以
不恨○韓愈詩自歎虞翻骨相屯

與張杜飲

即仲經
仲梁

故人寥落曉天星異縣相逢覺眼明
世事且休論向日酒尊聊喜侶承平
山公倒載羣兒笑焦遂高談四座驚
轟醉春風一千日愁城從此不能兵

焦遂

杜甫歌焦遂五斗方卓然高談雄辯驚四筵

秋夕

小簟涼多睡思清一窗風雨送秋聲
頻年但覺貂裘敝萬古何曾馬角生
寄食且依嚴尹幕附書誰往鄧州城
澆愁欲問東家酒恨殺寒雞不肯鳴

嚴尹

案指東平行省嚴實詳後碑

夢歸

顛顚南冠一楚囚歸心江漢日東流
青山歷歷鄉國夢黃葉蕭蕭風雨秋
貧裏有詩工作祟亂來無淚可供愁
殘年兄弟

相逢在隨分齋盞萬事休

作崇

楊萬里詩睡去恐遺詩作崇愁來當遣酒行成

白屋

白屋寒多發夕曛靜中歸思益紛紛長門誰買千金賦祖道
虛傳五鬼文地盡更無錐可置竈閑惟覺井長勤明年準擬
萊蕪住寄謝東鄰范史雲

無錐

傳燈錄去年貧無卓錫之地今年貧到錐也無

井勤

蘇軾詩萊肥人愈瘦竈閑井常勤

淮右

淮右城池幾處存宋州新事不堪論輔車謾欲通吳會突騎
誰當擣薊門細水浮花歸別澗斷雲含雨入孤邨空餘韓偓
傷時語畱與累臣一斷魂

顧氏云五六全用韓致光語即以結聯標出自成體遺山詩用前人成語極多陶杜句尤甚又未

可以此例舉之也

吳會

吳郡志世多稱吳門為吳會自唐已然此殊未當吳本秦會稽郡後漢分吳會稽為二郡後世指二浙之地謂吳與會稽也稽伯玉隱居剡山齊太祖手詔吳

會二郡以禮迎遣此證尤切

徐威卿相過畱二十許日將往高唐同李輔之贈別

二首

元名臣事略太常徐公名世隆字威卿陳州西華人金正大中登進士弟國初為東平行臺幕官中統元年拜燕京宣撫使○墓誌

云壬辰之亂朝請殺突已河南破公益太君北渡河嚴武惠公知公名招致東平幕府案此事當即過問時也○九卷得雄詩詳見三十九卷耶律

書○地志山東西路博州高唐縣○李輔之詳三十七卷濟南序

衣冠八座文昌府襖被三年同舍郎蕩蕩青天非向日蕭蕭
春色是他鄉傷時賈誼頻流涕臥病王章自激昂保社追隨
有成約不應關塞永相望

東南人物未彫零和氣春風四座傾但喜詩章多俊語豈知
談笑得新名二年阻絕干戈地百死相逢骨肉情別後相思
重迴首杏花尊酒記聊城

卽事

元文類曹居一李伯淵傳居一北渡河常欲作李伯淵傳既少暇且未詳其事竊有待焉戊申夏臥病相州俄故人僧洞然過客舍因語及王

辰變後之事始悉伯淵誅崔立之所自蓋惠安長老思公有力焉初京城荒殘思公徙居皇建院一日暮夜侍者入告曰有戎衣履金符者醉墮馬門外僞者不能起或致冠吾得無累乎令視之識者謂總帥李伯淵也使扶詣方丈憩俟其醒語之曰當此大變亂公何以嗜酒如是生爲男子與其徒沈溺于亂世曷若立身後不朽之策名哉伯淵鬚鬚若有契于中者見于色黎明乃召同志黃綱元帥相與拜恩而歸焉居無何往詣思屏人而言曰崔立狂豎誤國家傾危天子得越輕敢叛乃爾我欲誅之久矣師謂男子身後不朽之名其在此耶思拒不可曰爾何遽出此連禍語殆非老僧所敢聞者伯淵泣且誓思察其誠也乃握手歎曰我情亦不能隱矣公知老僧故不去此禍亂之地否吾天地間一閑人自相州遭過宣宗荷國厚恩二十餘年矣圖報萬一此何愛焉在我教中有大報恩七篇是同當焉者也思力微援寡不濟耳今幸聞公舉非常之事樹萬世之名使老僧朝見而夕死無憾合爪加額曰惟以必中爲公賀未幾過驛使有相困者伯淵因之入見崔立給曰丞相避擾不出今日之事有大不安者立欲出心動乘墮輒欲同伯淵厲聲曰我輩兵家子偶墮馬又何怪焉因強其行至故英邸之西通衢中忽有人突出抗言曰屈事願丞相與我作主且呼且前伍伯呼不止直詣立馬首挽其鞍時伯淵驂右卽拔刃抱而刺之洞貫至自中其左掌與之俱墮馬崔尚能語曰反爲賊奴所先隨斃伯淵暨黃擱等五人賞其其事乃大呼曰所誅者此逆賊耳他人無與焉稍鼠竄蜂逝帖如也遂殲裂尸祭于承天門下一軍哀號聲動天地翌日奔朱思公在其行時甲午秋七月也嗚呼金之亡也以忠義聞者不爲不多至于表表獨見于後世者得三人焉壬辰正月陽經軍潰奉御完顏陳

和尚死戰陣其鬪敵不屈如顏杲卿癸巳正月京城不守同判睦親府事
烏古孫孛吉死宗廟其守節自盡如北地王湛甲午正月蔡州陷右丞完
顏仲德死社稷從沒者幾千人彼敵翔之死國田橫之烈士有不足方者
太史公曰非死之難處死爲難蓋貴得其死所也來歙遇害光武賜策曰
憂國忘家忠孝彰著此三人者有之今夫伯淵不幸不得在三人之列然
可重者身非出于素宦世祿雖在軍伍中未嘗爲國家所知況當易代革
命之際雖責育之勇安所施而一旦蔑視廢棄手誅叛逆號祭亡社盡君
臣之義竟不墮冠仇孤軍出奔僅後世視之其亦三人之亞與李姓伯
淵名也或云燕郡寶坻人餘不可考始敵此奇節以附野史之末云案曹
君文不多見故全錄之○史崔立傳李琦者山西人爲鄆尉入京附立妻
有姿色立強之不得遂欲殺琦琦又數爲折希顏所辱乃首建殺立之謀
李伯淵者寶坻人本安平都尉司千戶美姿容深沈有謀每憤立不道欲
仗義殺之李賤奴者燕人以都尉權東面元帥初反時與立敵體貌敬之
後視賤奴如部曲賤奴積不能平與琦等合三年六月甲午備近境有朱
軍伯淵等陽與立謀備禦之策翌日曉伯淵等燒外封正門以警動立是
夜立殊不安一夕百臥起比明伯淵等身次約立腹火立從苑秀折希顏
數騎往諭京城民十五以上七十以下男子皆過太廟街集既還行及
梳行街伯淵欲送立還二王府立辭數回伯淵必欲親送立不疑倉卒中
就馬上抱立立顧曰汝欲殺我邪伯淵曰殺汝何傷即出匕首橫刺之洞
而中其手之抱立處再刺之立墮馬死伏兵起元帥黃擢三合殺苑秀折
希顏後至不知見立墮馬謂與人鬥斃前解之隨爲軍士所傷被創走梁
門外追斬之伯淵係之屍馬尾至內前斃于衆曰立殺害劫奪然淫暴虐
大逆不道古今罕有當殺之而萬口齊聲曰寸斬之未禱也乃梟立首置
承天門祭袁宗伯淵以下軍民皆勸或創其心生敬之以三尸挂關前

樹上樹忽援人謂樹有靈亦靈其所汙已而有告立墮宮中珍玩遂歸其家以其妻王花兒賜丞相錢北帳下士。齊東野語端平元年七月二日抵東京二十里初寨猶有居人遺跡及桑棗園初五日整兵入城行省李伯淵先期以文書來降願與谷用安范用吉等締約至是乃殺所立大王崔立率父老出迎見兵六七百人

逆豎終當餽縷分揮刀今得快三軍燃臍易盡嗟何及遺臭無窮古未聞京觀豈當誣翟義衰衣自合從高勳秋風一掬孤臣淚叫斷蒼梧日暮雲

燃臍

董卓事見後漢本傳

遺臭

桓溫語見晉書本傳

京觀

漢書翟義傳義為東郡守王莽居攝義心惡之以父子受漢厚恩當為國討賊因舉

兵立嚴鄉侯劉信為天子移檄郡國非遣孫建等七將軍發兵擊義攻義于圍城破之捕得義尸磔陳都市乃下詔曰蓋聞古者伐不敬取其醜餽築武軍封以為大戮于是平有京觀以懲淫亂聚之凡五所各方六丈高六尺築為軍封建表木高丈六尺書曰反虜逆賊鯁殼在所高勳契丹國志太宗會同十一年先是張彥澤與閻門使高勳有隙彥澤入其家殺其叔父及弟而去後帝至京師開彥澤劫掠怒而鎖之高勳與百姓亦爭投牒疏其惡乃命高勳監刑彥澤前所殺士大夫子孫皆經杖哭隨詔罵以杖朴之彥澤俛首無一言行至北市斷脉出鎖然後用刑勳命割其心祭死者市人爭破其臍取脂燭其肉而食之

望王李歸程

案此指王百一李仁卿移居詩云永懷王與李朔漢行當歸即此

一褐霜寒晚思孤眼中行李見歸途虞卿仲子死不朽石父
晏嬰今豈無義士龍沙元咫尺累臣駒隙自舒徐何時斗酒
歡相勞驚看燕家頭白烏

虞卿

史記本傳卿以魏齊之故不重卿相之印與齊間行卒去趙困于梁齊死不得意乃著書

仲子

又刺客傳嚴仲子以黃金百鎰為魏政母壽曰聞足

下義甚高故進百金者以交足下之驩敢有求望耶及政以刺俠累自決人皆曰仲子可謂知人能得士矣

石晏

又管晏傳越石父賢在縶中晏子贖之歸弗

謝入闈久之石父請絕曰吾聞君子詘于不知已而信于知己知已而無禮不若在縶繼中晏子于是延為上客

龍沙

後漢班超傳贊坦步縶繼中晏子贖之歸弗

龍沙漠也

秋夜

顧氏云此為汴京之難言之郝伯常有耕磨甘露碑詩可考案此為崔立碑事言之郝詩之曹聽翁即歸潛崔立碑事篇中作詩之曹通甫也

總由歸潛後四卷遺書時尚未見故擬議少確實

九死餘生氣息存蕭條門巷似荒邨春雷謾說驚坯戶皎日
何曾入覆盆濟水有情添別淚吳雲無夢寄歸魂百年世事
兼身事尊酒何人與細論

坯戶

月令集錄坯戶注坯蓋也

覆盆

路肩王詩覆盆徒望自於戶元驚雷

歸魂

杜甫詩大寒不成寐無夢寄歸魂

甲午除夜

附李俊其鶴鳴集聞蔡州被詩不周力推犬柱折陰山忽微雷家骨方將一你賭乾坤誰開四面無日月石馬汗滴昭陵血銅

人淚泣秋風客君不見周家美化八百年遺恨黍離詩一篇注云甲午正月十日已酉

暗中人事忽推遷坐守寒灰望復燃已恨太官餘麴餅爭教漢水入膠船神功聖德三千牘大定明昌五十年甲子兩週今日盡空將衰淚灑吳天

灰然

漢韓安國傳死灰不復然平口然即瀾之

麴餅

晉愍紀京師飢甚人相食太官有麴數十餅屑粥以供帝

膠船

帝王世紀周昭王濟漢船

人惡之以膠船進至

神功

史太祖紀天會十三年立開天啓神慶德神功之碑于燕京城南

甲子

續夷堅志古人上壽皆以千萬

歲為言國初種人舉薦惟祝有二十而已自武元收國元年乙未至哀宗天興三年甲午適兩甲子周矣歷年之歲遂應

乙未正月九日立春

十度新正九處家今年癡坐轉堪嗟一冬殘雪不肯盡連日苦寒殊未涯重碧總誇燕市酒小紅誰記上林花殘魂零落

今無幾乞與春風惱鬢華

重碧

杜甫詩重碧沽春酒輕紅擘荔枝

杏花落後分韻得歸字

獼能醫病頰肥鸞膠無那片紅飛殘陽淡淡不肯下流水
溶溶何處歸煮酒青林寒食過明妝高燭賞心違寫生正有
徐熙在漢苑招魂果是非

獼髓

拾遺記吳孫和刻水晶如意傷鄧夫人頰醫曰得白獼髓和琥珀屑敷之當滅痕

三仙祠

三仙祠下往來頻憔悴征衫滿路塵簫鼓未休寒食酒樵蘇
時見舊都人吹殘芳樹紅仍在碾破平田綠已勻西北并州
隔千里幾時還我故鄉春

送輔之仲庸還大梁

蔡邕之當卽李天與仲庸僅見三十九卷與自見公近得仲庸書報未詳其姓考下詩之有懷

李郭二公又河汾詩曹益甫有送李郭
二子還鄉詩是仲庸或郭姓郭侯考

驂騑爭道渺翩翩誰遣風塵失壯年
四壁舊聞懸磬宅一囊
今有賣書錢淋浪別酒青燈夜滅沒孤帆
落照邊想得還家
過春半故都喬木滿蒼煙

繡江汎舟有懷李郭二公

案濟南行記云東入水柵柵之水名
繡江發源長白山下周圖三四十里

荷花如錦水如天狼藉秋香擁畫船
長白風煙最瀟灑外臺
賓主重畱連勝遊每恨隔千里樂事便當論
百年咫尺西州
兩詩客不來同作飲中仙

送杜子

案濟南行記云約仲
梁俱東當卽此時事

洛陽塵土化緇衣又見孤雲著處飛
北渚曉晴山入座東原
春好妓成圍來鴻去燕三年別深谷高陵萬事非
轟醉春風
有成約可能容易話東歸

眼中

眼中時事益紛然擁被寒窗夜不眠
骨肉他鄉各異縣衣冠今日是何年
枯槐聚蟻無多地秋水鳴蛙自一天
何處青山隔塵土一庵吾欲送華顛

送杜招撫歸西山

杜亂後為黃冠師○案宣紀元光元年十月庚寅徙彰德招撫使杜先軍于衛州張開傳林州亂遷

招撫使康璠推杜先為招撫使

少日先聲懾虎貔只今騎馬欲雞棲
邯鄲枕上人初覺秋水篇中物已齊
父老樵漁知有社將軍桃李自成蹊
因君喚起思鄉意君在西山我更西

騎馬

杜甫詩避人焚諫草騎馬欲雞棲

成蹊

史記李廣傳桃李不言下自成蹊

寄欽止李兄

中州集李獻甫傳兄欽止欽若皆中朝名勝○歸潛志李欽叔傳從兄欽止獻卿先擢第繼以欽叔又繼以從兄欽

若獻誠欽用獻甫故李氏有四桂堂○元史李治傳世祖在潛邸遣使召仁卿問今之人材賢否對曰今儒生有如魏璠李獻卿蘭光庭趙復鄭經

王博文等皆有用之才。○本集十卷答詩又和解詩十一卷寫真詩二十五卷贊皇太君銘獻卿中泰和三年進士三十九卷寄耶律書新樂府又有浣溪沙詞。○歸潛志定齊居士李獻卿欽止有歸潛堂詩。

征車南北轉秋蓬關塞相望兩禿翁
袞袞便當隨世路悠悠難復倚天公
銅駝荆棘千年後金馬衣冠一夢中
尊酒雲州古城下幾時攜手哭春風

兩禿翁

蘇軾詩頗張
醉素兩禿翁

雲州

史地志西京路大同府懷仁縣貞祐二年升雲州

有寄

飛鴻來處是營平喜向斜封見姓名
千里呂安思叔夜五更殘月伴長庚
關河秋興風景暮長路渴心塵土生
南渡詩人吾未老幾時同醉鳳凰城

斜封

唐書選舉志中宗時章后及太平公主用事降墨勅斜封授官數千

殘月

韓愈詩東方半明大星沒獨有太白配殘月

鎮州與文舉百一飲

史哀紀正大元年五月賜詞賦進士王鶚以下五十人及第。○樂志哀宗遷蔡天興二年七月

丁巳太祖太宗及后妃御容至自汴京奉安于乾元寺左宜徽使溫敦七十五奏當用樂上曰樂須太常奈何七十五曰市有優樂可假用之權左右司員外郎王鶚奏曰世俗之樂豈可施于帝王之前遂止○名臣事略公名鶚字百一開州東明人金正大初中進士第累擢中書省右司員外郎金亡居保定歲甲辰召居王邸中統元年拜翰林學士承旨奏翰林國史院詔從其請至元五年致仕十年卒年八十四○太常徐公撰墓碑公幼穎悟讀書日記千餘言終身不忘長工詞賦有聲場屋年十九山東平貢禮部再薦科名會河朔亂舉家南渡流離頓挫中身愈困而學愈力故其成就有過人者正大甲申登詞賦第一甲第一人釋褐賜緋授率直大夫應奉翰林文字同知制誥兼國史院編脩官再考改歸德府判官兼城父令下車之後立教條正風俗未幾政成吏畏而民安之廉司以治聞遷同知申州事兼汝陽令政聲籍甚俄丁內艱金主遷蔡起復尚書省都事陞右司員外郎兼翰林脩撰金主見公言事深中時病惜其柄用之晚蔡陷萬戶張柔素聞公名輦之北渡館于保州十餘年深自韜晦若將終身焉○元史張柔傳汝南破一小校縛一人至獲獨異采問之金狀元王鶚也解其縛待以賓禮○本集三十九卷奇耶律書

翁仲遺墟草棘秋蒼龍雙闕記神州只知終老歸唐土忽漫相看是楚囚日月盡隨天北轉古今誰見海西流眼中二老風流在一醉從教萬事休

翁仲

柳宗元詩伏波故道風烟在翁仲遺墟草樹平

別王使君丈從之

本集墓銘公諱若虛字從之姓王氏蘇城人幼穎悟若夙昔在文字間者承安二年經義進士調

州錄事歷管城門山二令入爲國史院編脩官遷應奉翰林文字同知制誥正大初遷平涼判官召爲左司諫轉延州刺史起翰林待制遂爲直學士京城破後微服北歸得壽七十公典貢舉二十年門生半天下而不立崖岸雖小書生登其門亦殷重之滑稽無窮談笑尤有味而以雅重自持朋會間春風和氣周浹四座使人愛之而不忘也

謝公每見皆名語白傅相看只故情尊酒風流有今文玉堂
人物記升平太山北斗千年在和氣春風四座傾別後殷勤
更誰接只應偏憶老門生

寄汴禪師

師舊隱濟源

白頭歲月坐詩窮止有相逢一笑同齋粥空疎想君瘦冠巾
收歛定誰公夢魂歷歷山間路世事悠悠耳外風見說懸泉
好薇蕨草堂知我是鄰翁

時汰還穰老家甚急故有冠巾收歛之句

冠巾

韓愈詩我欲收歛加冠巾

衛州感事二首

地志河北西路衛州○白撒傳宣宗南渡移州于宜邨築新城于河北岸惟北面受敵而以石包之歲屯重兵

于此○元史史天澤傳癸巳春金主突圍而出令完顏白撒自黃龍岡來襲新衛天澤率輕騎馳赴之比至圍已合天澤奮戈突至城下呼守者曰汝等勉力援兵且至復躍出東背披靡絕軍夾擊之白撒等敗走蒲城天澤尾其後白撒等兵尚八萬俘斬殆盡金主以單舸走歸德天澤追至歸德與諸軍會新衛○陵川集衛南有感詩衛北傳聞卷甲趨衛南誰意更南驅百年厭數雖當盡孤注乾坤便可輸漢劉鴻溝遠門楚蜀亡江表益征吳兵家勝敗尋常事萬折彌堅是丈夫

神龍失水困蜉蝣一舸倉皇入宋州紫氣已沈牛斗夜白雲空望帝鄉秋劫前寶地三千界夢裏瓊枝十二樓欲就長河問遺事悠悠東注不還流

白雲鄉

飛燕外傳我不能效武皇帝求白雲鄉也

白塔亭亭古佛祠往年曾此走京師不知江令還家日何似湘纍去國時離合興亡遽如此棲遲零落竟安之太行千里

青如染落日闌干有所思

落日一作獨凭

江令

梁書江總傳侯景之亂避難崎嶇累年至會稽郡
憩于龍華寺杜甫詩遠塊吳江總還家尚黑頭

望蘇門

地志河北西路
衛州蘇門縣

諸父當年此往還客衣塵土淚斑斑太行秀發眉宇見老阮
亡來尊俎閑出岫暮雲歸有處投林孤鶴杳難攀湧金亭上
秋如畫興在青林杳靄間

元遺山詩集箋注卷八終